



REPUBLIKA E SHQIPËRISË

KUVENDI

Komisionit *ad hoc* me 12 anëtarë për përzgjedhjen e kandidatëve për krijimin e institucioneve të rivlerësimit sipas ligjit nr. 84/2016 “Për rivlerësimin kalimtar të gjyqtarëve dhe prokurorëve në Republikën e Shqipërisë”

PROCESVERBAL

Datë 06.06.2017, ora 10:00

Drejton mbledhjen:

Pandeli Majko – kryetar i Komisionit

Rendi i ditës:

1. Miratimi i procesverbalit të datës 25 maj 2017.
2. Miratimi i kalendarit për zhvillimin e seancës/ave dëgjimore publike me kandidatët e listës për votim që konkurrojnë për Komisionin e Pavarur të Kualifikimit dhe Komisionerët Publikë, të përcjellë nga Komisioni *ad hoc* për Verifikimin e Kandidatëve.
3. Seancë dëgjimore me kandidatët e listës për votim, që konkurrojnë për Komisionin e Pavarur të Kualifikimit dhe komisionerët publikë.

Marrin pjesë:

Pandeli Majko, Ulsi Manja, Mesila Doda, Evis Kushi, Dhurata Çupi, Aldo Bumçi, Luan Rama dhe Bashkim Fino.

Mungojnë:

Oerd Bylykbashi, Fatmir Mediu, Gent Strazimiri, Jorida Tabaku.

HAPET MBLEDHJA

Pandeli Majko – Mirëdita, zonja dhe zotërinj deputetë.

Do t'i dëgjojmë të gjithë kandidatët, sipas listës, por unë do të përpiqem t'u bëj pyetje sa më të shkurtra, edhe ju keni të drejtë, po ashtu.

(Ndërhyrje pa mikrofon.)

Jo, votimi është tjetër. Votimi bëhet në sallën lart.

Duke qenë se kuorumi është i realizuar dhe duke mirëkuptuar mungesat edhe për shkak të fushatës elektorale, një pjesë e kolegëve, sipas informacionit nga sekretaria, kanë njoftuar se do të vijnë ndërkohë, fillojmë mbledhjen meqenëse kemi shumicën e nevojshme të pranishme.

Të futen mediet!

Rendi i ditës i kësaj mbledhje është, së pari, miratimi i procesverbalit të datës 25 maj të vitit 2017, të cilin secili e ka përpara.

Së dyti, është miratimi i kalendarit për seancat dëgjimore publike me kandidatët e listës për votim, që konkurrojnë për Komisionin e Pavarur të Kualifikimit dhe të Komisionerit Publik të përcjellë nga Komisioni *ad hoc* për Verifikimin e Kandidatëve.

Seanca do të fillojë në orën 11:00, por do të na lejohen edhe cedime të natyrave të tjera, duke pasur parasysh edhe momentin në të cilin bëhet mbledhja e komisionit tonë.

Para se të fillojmë dëgjimin e kandidatëve, dëshiroj t'ju lexoj të gjithë anëtarëve nenin 11, për zhvillimin e seancave dëgjimore. Është i rëndësishëm pasi çdo anëtar duhet të ketë një ide të qartë lidhur me atë çfarë jemi duke bërë. “Çdo anëtar i Komisionit *ad hoc* të Përzgjedhjes ka të drejtë t'u bëjë pyetje kandidatëve. Anëtar i Komisionit *ad hoc* të Përzgjedhjes e merr fjalën të bëjë pyetje pas dhënies të së drejtës nga drejtuesi i seancës. Anëtar i Komisionit *ad hoc* të Përzgjedhjes nuk ka të drejtë të japë konkluzione gjatë zhvillimit të seancës dëgjimore. Anëtarët e Komisionit *ad hoc* të Përzgjedhjes nuk kanë të drejtë të komentojnë njëri-tjetrin për karakterin e pyetjeve që u drejtohen kandidatëve. Drejtuesi i seancës i jep të drejtën e fjalës me radhë një anëtar nga shumica parlamentare dhe një nga pakica. Anëtarët e Komisionit *ad hoc* të Përzgjedhjes kanë të drejtë për të kërkuar sqarime dhe saktësime të mëtejshme, vetëm pasi të ketë përfunduar radha për secilin nga anëtarët e tjerë”, kështu thuhet në nenin 11 për procedurat parlamentare për funksionimin e komisioneve *ad hoc* dhe realizimin e procesit të votimit sipas ligjit nr. 84/2016 “Për rivlerësimin kalimtar të gjyqtarëve dhe prokurorëve të Republikës së Shqipërisë”.

A keni vërejtje për procesverbalin?

Miratohet.

A keni vërejtje për programin?

Miratohet.

Procedojmë me thirrjen e kandidatëve. Do t'u japim 5 minuta kohë. Kemi bërë një përjashtim nga radha, bëhet fjalë për një grua, e cila është shtatzënë dhe do ta thërrasim të parën, por jo sipas rendit alfabetik.

Fjalën e ka zonja Etleda Çiftja ka kandiduar për të gjitha pozicionet. Do t'ju lutesha shkurtimisht të paraqisni veten përballë komisionit dhe të jepni arsyet pse dëshironi që të...

(Diskutime pa mikrofon)

Unë jo më shumë se 5 minuta do t'ju lija, pasi besoj se të gjithë kolegët e kanë CV-në, por, meqë është shtatzënë, i lejohet të flasë...

Etleda Çiftja – Ju falënderoj!

Pandeli Majko – Ju lutem, shkurtimisht!

Etleda Çiftja – Faleminderit, zoti Majko!

Faleminderit anëtarëve të komisionit!

Unë quhem Etleda Çiftja. Jam diplomuar si juriste në vitin 1999. Në vitin 2001 kam marrë titullin e avokatit, pasi kam kryer stazhin përkatës dhe nga viti 1999 e më tej kam punuar në sektorin privat me avokatinë, por edhe si konsulente ligjore pranë dy projekteve shumë të rëndësishme të infrastrukturës, njëra në telekomunikacion dhe tjetra në energji. Eksperienca ime është kryesisht në sektorin privat dhe, siç jua thashë, kam qenë në pozicione drejtuese si drejtoreshë ligjore pranë këtyre dy kompanive, por njëkohësisht kam ndjekur edhe shumë çështje civile pranë gjykatave të shkallës së parë, Gjykatës së Apelit dhe Gjykatës së Lartë. Aktualisht për këtë pozicion aplikova pasi pashë njoftimin dhe, pasi i bëra një checklistë vetes, mendova se i plotësoja të gjitha kushtet e nenit 6 të ligjit nr. 84/2016, ndaj pse të mos ia jepja shansin vetes, meqë kam punuar gjithmonë në privat. Duke qenë se kjo është një nga reformat më të rëndësishme dhe për mua është një sfidë tjetër nga ato që unë kam punuar, mendova t'i jepja mundësinë vetes të aplikoj, duke menduar se është shansi më i mirë për secilin nga ne që të mos shohim vetëm interesin privat, por edhe interesin publik ose interesin e të gjithë shqiptarëve për të aplikuar.

Pse unë mendoj se duhet të votohem si kandidate? Në CV-në që unë kam paraqitur është pjesa tjetër e punës sime, si eksperienca ime ligjore, ku kam punuar dhe ku e kam pasur fushën e veprimit.

Pra, në lidhje me atë se pse unë duhet të votohem si kandidate janë tri arsye kryesore:

E para, duke pasur parasysh frymën e ligjit, që është kthimi i besueshmërisë së publikut te drejtësia, mendoj se, duke mos qenë e angazhuar gjatë 17 vjetëve eksperiencë në asnjë nga

pushtetet, siç janë legjislativi, gjyqësori apo ekzekutivi, më bën një kandidat preferencial, pa dashur absolutisht të ofendoj kolegët e tjerë, pasi jep më shumë besueshmëri te publiku që të angazhohen njerëz, të cilët do të kryenin procesin e vetingut, duke pasur përballë subjektet e vlerësimit, ku ju vetë nuk keni qenë pjesë e sistemit. Kjo është arsyeja kryesore.

Arsyeja e dytë, por jo më pak e rëndësishme është integriteti moral dhe profesional. Integriteti profesional shprehet qartë në referencat e dhëna nga punëdhënësi, nga drejtorët ekzekutivë përkatës ku unë kam punuar prej shumë vjetësh dhe integriteti moral, të cilin, siç e thashë edhe në komisionin tjetër, mendoj se unë kam lindur me integritet moral, sepse kjo nuk fitohet gjatë rrugës, këtë ose e ke ose nuk e ke. Pra, kjo është ajo që unë preferoj të them në lidhje me integritetin moral. Deri tani fakti që unë kam gati 16 vjet dhe nuk kam pasur asnjë lloj mase disiplinore dhe asnjë lloj problemi në lidhje me integritetin, pasi kemi kaluar edhe në sitën e ONM-së, edhe në sitën e Avokatit të Popullit, ku shpresoj dhe besoj në çekimin e saktë të të gjithë kandidaturave, mendoj se kjo është shumë e rëndësishme për këtë ligj dhe shumë e rëndësishme për kandidatët, të cilën besoj se edhe ju si komision do t'i vlerësoni si gjënë kryesore.

E treta, duke punuar gjithmonë në privat dhe me investitorë të huaj, të vjen frymëzimi që të kontribuosh në këto gjëra, pasi kontakti me të huajt të bën që të shohësh më shumë anët në të cilat çalon sistemi ynë. Pra, për këtë arsye mendova që, duke qenë pjesë, nëse do të votohem si anëtare e komisioneve të vetingut, do të jepja kontributin tim për të përmirësuar sa më shumë gjendjen dhe për të qenë patjetër në zbatimin dhe në frymën e ligjit, siç e keni miratuar ju si legjislatorë.

Një arsye tjetër është fakti, jo që unë jam shtatzënë se kjo është diçka tjetër, por qenia femër në këto organe, pa dashur të diskriminoj burrat, e bën një gjë shumë pozitive kandidaturën time, pasi, siç keni parë, në ambientin tonë shqiptar femrat gjithmonë, jo se kanë treguar më shumë integritet, por vetë nga natyra janë të prirura që të jenë 100% me integritet, sepse është edhe çështje e perceptimit të integritetit se si do ta perceptonin të tjerët, prandaj mendoj se kjo është shumë domethënëse për organet e vetingut, sepse do të kemi përballë....

Kjo është një sfidë shumë e madhe, sepse të marrësh angazhimin për një sfidë të tillë është shumë, pasi ne femrat kemi sfida familjare, por edhe sfida personale, prandaj unë do të dëshiroja dhe kam besimin se komisioni do të jetë shumë objektiv në votimin që do të bëjë. Këto janë arsyet për të cilat mendoj se duhet të më votoni.

Faleminderit!

Pandali Majko – Faleminderit ju!

A ka pyetje nga kolegët?

Dhurata Çupi (Tyli) – Zonja Etleda, së pari faleminderit që jeni këtu!

Së dyti, nga CV-ja juaj dhe nga përshkrimi konstatoj se keni ndjekur çështje gjyqësore në Gjykatën Administrative, Civile dhe në Gjykatën e Lartë. Sipas mendimit tuaj, a e komprometon kjo vendimmarrjen tuaj në të ardhmen, nëse ju votoheni për procesin e vetingut, për shkak të pjesëmarrjes suaj në disa procese gjyqësore? A keni ndonjë konflikt interesi gjatë pjesëmarrjes suaj në këto procese?

Faleminderit!

Etleda Çiftja – Faleminderit për pyetjen!

Është e vërtetë që unë kam ndjekur çështje të ndryshme në Gjykatën Administrative dhe në të gjitha shkallët e gjykimit, por besoj se kjo është detyrë e çdokujt që zgjedh të bëhet avokat dhe aktualisht nuk kam konstatuar dhe nuk konstatoj asnjë konflikt interesi, pasi edhe në çështjet që unë kam ndjekur në lidhje me klientët që unë kam pasur, kam ndjekur gjithmonë parimin e drejtësisë për të bërë drejtësi dhe jo parimin e bërjes së pazareve për të fituar çështjet. Për këtë arsye nuk mendoj se i përkas atij grupi, të cilin ju nënkuptoni me pyetjen tuaj.

Faleminderit!

Pandeli Majko – A ka pyetje të tjera? Jo.

Ju uroj gjithë të mirat dhe mbarësi!

Etleda Çiftja – Faleminderit!

Pandali Majko – Kandidati tjetër është zoti Arben Lena.

Ju lutem, prezantohuni dhe na jepni arsyet pse kërkonti të kandidoni! Koha juaj është 3 minuta dhe më pas do t'u përgjigjeni pyetjeve nëse ka.

Arben Lena – Ju faleminderit!

Unë quhem Arben Lena. Kam lindur në qytetin e Korçës në vitin 1969 dhe vazhdoj të jetoj dhe të punoj aty. Në lidhje me arsyet pse kandidoj, e cila është një pyetje që ia kam bërë edhe vetes sime, pasi aktualisht kam një zyrë avokatie, kam 15 vjet avokat dhe normalisht në lidhje me të ardhurat nga paga, mendoj se kjo nuk është si shtysë. Pra, shkakun që unë mendoj të kandidoj, pasi është një pyetje që ia kam bërë vetes, është se dua diçka më të mirë për shoqërinë dhe për veten tonë. Unë kam filluar punë në sistemin e drejtësisë në vitin 1994 dhe mendoj që realisht sistemi i drejtësisë duhet të reformohet.

Në lidhje me kualifikimet, kam pasur shumë të tilla, qoftë trajnime nga USAID-i, OPDAT-i, si dhe kam qenë pjesëmarrës i Balcan Vizional Rule of Law Network ose Shteti Ballkanik i të Drejtës (Networku i Shtetit Ballkanik të së Drejtës), i cili është themeluar nga Dhoma Amerikane e Avokatisë. Jam anëtar i kryesisë së këtij networku, i cili funksionon prej vitit 2014. Pak a shumë kjo është CV ime. Në mënyrë më të hollësishme, ju e keni përpara.

Pandeli Majko – CV-në e kanë të gjithë kolegët përpara, prandaj unë u përpoqa t’jua thosha dhe ju e bëtë mirë me këtë mënyrë të të trajtuari në lidhje me arsyet se pse kërkonit të kandidoni.

A ka pyetje nga kolegët? Nuk ka.

Zoti Arben, ju faleminderit!

Arben Lena – Faleminderit ju!

Pandeli Majko – Fjalën e ka zonja Albana Tushe.

Albana Tushe – Mirëdita!

Pandeli Majko – Mirëdita!

Keni në dispozicion një kohë prej 3 minutash. Shkurtimisht arsyet pse jeni këtu dhe pse kërkonit të kandidoni për vendin e komisionerit publik.

Albana Tushe – I nderuar zoti kryetar!

Të nderuar anëtarë,

Ju falënderoj për thirrjen!

Unë vij nga avokatia. Jam avokate që prej vitit 2004 kur jam licencuar dhe e kam ushtruar këtë profesion që nga ky vit deri tani pa ndërprerje në fushën profesionale. Mendoj se procesi është shumë i rëndësishëm, historik dhe jetik, madje, për sistemin e drejtësisë në vend, si dhe kam gjykuar se eksperiencia ime profesionale në zyrat e avokatisë më të njohura në vend si kombëtare, ashtu edhe ndërkombëtare është e tillë që më mundëson kontributin që unë mund të jap në këtë proces kaq të rëndësishëm. Një nga arsyet e tjera, për të cilën mendoj se është thelbësore, që lidhet edhe me integritetin, është besimi që unë kam te kjo reformë. Nisur nga kuadri ligjor, me aq sa unë kam lexuar, është bërë një punë arkitekturore shumë e mire, për të cilën gjej rastin si qytetare t’ju falënderoj. Pra, arkitektura e sistemit që është ngritur, të paktën nga dokumentacioni i reformës në drejtësi që unë kam studiuar deri tani, është shumë e mirë, si dhe mendoj se reflekton edhe një moment shumë të rëndësishëm që është një lloj konsensusi jo vetëm politik, por edhe shumë i zgjeruar në sensin e përfshirjes së publikut, i cili është një element shumë i rëndësishëm për çështjen e kushtetutshmërisë veçanërisht.

Këto janë arsyet e përmbledhura se përse unë kam vendosur të kandidoj për këtë pozicion.

Pandeli Majko – Faleminderit për mënyrën e koncentruar dhe të trajtuarit të problemit.

A ka pyetje nga kolegët? Jo.

Faleminderit!

Albana Tushe – Faleminderit ju!

Pandeli Majko – Ne CV-në tuaj e kemi përpara dhe për këtë arsye i kemi pak të shkurtra gjërat në mënyrën e diskutimit.

Faleminderit!

Albana Tushe – Punë të mbarë!

Pandeli Majko – Gjithë të mirat!

Personi në radhë është Aldona Sylaj.

Aldona Sylaj – Përshëndetje!

Pandeli Majko – Përshëndetje!

Keni 3 minuta kohë për të na shpjeguar arsyet pse dëshironi të kandidoni për komisionere publike.

Aldona Sylaj - Faleminderit!

Mendoj se ndihem e respektuar dhe e vlerësuar që kalova komisionin e parë. Ndihej e vlerësuar edhe nga vlerësimi i anëtarëve të komisionit, edhe nga vlerësimi i ndërkombëtarëve. Në fakt unë kam aplikuar për të gjitha pozicionet, por për vjetërsinë që e kam 14,2 vjet punë, më duket nuk plotësova dot kriterin kryesor, atë të 15 vjetëve punë. Megjithatë, ndihem e nderuar edhe për pozicionin e komisionerit publik. Mendoj se kam dijen, vlerat, pjekurinë, përvojën, integritetin për të qenë përfaqësuese në këtë pozicion të lartë kushtetues. Nisur edhe nga eksperiencia e punëve, eksperiencia profesionale që kam pasur, kjo edhe nga formimi akademik që kam, mendoj se jam në kohën e duhur, në momentin e duhur për një pozicion të tillë.

Pandeli Majko – Dakord. Ne CV-në tuaj e kemi përpara. Siç e përmendët edhe vetë, jeni pyetur edhe në komisione të tjera. A kanë kolegët ndonjë pyetje? Dakord. Faleminderit!

Aldona Sylaj – Në vitet 1999-2000 kam qenë ideatore dhe moderatore e një emisioni televiziv në lidhje me reformën e parë në drejtësi, ku kam ftuar personalitete të larta të drejtësisë shqiptare, ku dhe janë trajtuar problematikat e asaj kohe. Mendoj se në këtë moment duhet të jem pjesë vetë e këtij procesi. Mendoj se është një faktor më tepër edhe në kuptimin se unë e njoh shumë mirë interesin publik. Nëse po aplikoj sot, po e bëj për komisionere publike, jo për pozicionet e tjera, për shkak edhe të dijeve në fushën akademike të së Drejtës Europiane, duke shmangur çdo lloj skepticizmi mbi implementimin e së drejtës komunitare me atë nacionale.

Faleminderit!

Pandeli Majko - Faleminderit!

Fjalën e ka Aljon Cenolli.

Zoti Cenolli, keni 3 minuta kohë për të na shpjeguar në mënyrë të koncentruar arsyet pse jeni këtu dhe dëshironi të kandidoni për pozicionin e komisionerit publik.

Aljon Cenolli - Faleminderit!

Shkurtimisht mund të them se kam mbaruar me rezultate të shkëlqyera në formimin si jurist. Kam qenë ndër të parët që kam bërë magistraturë jashtë shtetit në Gjermani. Kam qenë për vite të tëra drejtues i Drejtorisë së Përafrimit të Legjislacionit me Bashkimin Europian. Kështu që me modesti e konsideroj veten si njohës shumë i mirë i Legjislacionit të Përafrimit Europian. Me vite të tëra kam punuar në Ministrinë e Drejtësisë në pozicione të ndryshme në hartimin e legjislacionit në përputhje me standardet europiane, kështu që mund të ofroj të gjithë ekspertizën e nevojshme për standardet më të mira europiane në këtë proces. Zotëroj një eksperiencë shumëvjeçare, për sa i përket zbatimit të legjislacionit dhe, mbi të gjitha, ofroj integritetin tim personal dhe profesional, që mendoj se është një aset shumë i vyer për pozicionin për të cilin unë po aplikoj sot.

Pandeli Majko – A ka pyetje nga kolegët? Po.

Aldo Bumçi - Faleminderit!

Zoti Cenolli, ju keni dhënë mësim në Shkollën e Magistraturës. Kjo shkollë u krijua si një reformë për të nxjerrë vendimmarrjen politike nga emërimi i gjyqtarëve. Pra, ishte një shkollë që prodhonte gjyqtarë. Me një konkurrin shumë të fortë aplikonin shumë dhe në fund kalonin më pak se 10 gjyqtarë. Shkolla ka filluar në vitet 1996-1997 dhe në vitin 2000 ka dalë brezi i parë i magistratëve. Pra, kemi rreth 150 magistratë, gjyqtarë. Nëse kemi një shkollë të financuar nga institucionet, si Këshilli i Europës, Bashkimi Europian, një sistem tërësisht apolitik, konkurrin për të përmbushur nevojat që ka gjyqësori shqiptar, si e shikoni tani këtë reformë që do të bëjë një verifikim rrënjësor të këtyre gjyqtarëve dhe të këtij sistemi? Pra, u ngrit një sistem për të prodhuar gjyqtarë. Tashmë kemi një rishikim 100% të trupës gjyqësore. A shikoni që ka një kontradiktë ndërmjet një sistemi disavjeçar që prodhon gjyqtarë në mënyrë institucionale, jashtë politikës, me konkurrin të fortë, të rinj, me asistencë ndërkombëtare? Pra, prodhimi i këtij sistemi i ndërtuar nga ndërkombëtarët futet tërësisht në rishikim.

Aljon Cenolli – Unë besoj se duke ofruar vetëm integritetin, pozicioni im këtu do të ishte krejtësisht i pavend në qoftë se nuk do të kishte aspektin profesional. Por, nga ana tjetër, pasja e kriterit profesional është totalisht e pamjaftueshme në qoftë se personi nuk ofron dhe nuk zotëron integritetin e tij. Personalisht flas se nga gjithë ato vite pedagogjike në Shkollën e Magistraturës, para saj në Fakultetin Juridik, dhe në përgjithësi gjithë këto vite në sistemin e drejtësisë, unë mendoj që në qoftë se nuk hyn me integritet, nuk ke se si del me integritet. Thjesht ke mësuar nenet dhe asgjë më shumë.

Pandeli Majko – A ka pyetje? Faleminderit!

Fjalën e ka Alma Faskaj, Vokopola.

Zonja Alma, keni 3 minuta kohë për të shpjeguar pse po kandidoni për të gjitha pozicionet. Kolegët më pas mund t'ju bëjnë edhe pyetje.

Alma Faskaj (Vokopola) - Faleminderit!

Në fakt, unë e kam prezantimin e tretë në lidhje me seancat dëgjimore. Kam kandiduar për të tria pozicionet, sepse mendoj që kam eksperiencën e duhur, profesionale, akademike dhe integritetin për të kryer këto 3 detyra. Unë kam një eksperiencë prej 22 vjetësh si juriste, e cila ka filluar me detyrën e gjyqtare. Më pas kam punuar si pedagoge në Fakultetin e Drejtësisë. Kam punuar si këshilltare dhe eksperte e Avokatit të Popullit. Kam qenë një ndër personat që kam kontribuar në ndërtimin e këtij institucioni, si dhe në mirëfunksionimin e tij. Më pas kam punuar si ndihmëse ligjore në Prokurorinë e Përgjithshme. Pra, në sistemin e drejtësisë. Aktualisht jam këshilltare pranë Shërbimit të Përafrimit të Legjislacionit. Kam qenë pjesë e Sekretariatit Teknik të Reformës në Drejtësi. Pra, kam dhënë kontributin tim modest në procesin e reformës në drejtësi. Nga ana akademike kam titullin doktore shkencash, jam pedagoge në Fakultetin e Drejtësisë, pedagoge edhe në Shkollën e Magjistraturës. Pra, nisur nga *background*-i im profesional, natyrisht dhe integriteti i cili tregon në fakt që unë kam një eksperiencë të gjatë në fushën e drejtësisë, mendoj se jam e përshtatshme për t'i kryer këto detyra.

Pandeli Majko – A ka pyetje nga kolegët? Siç e thatë edhe vetë është intervistimi juaj i tretë. Faleminderit!

Ardian Hajdari. Zoti Hajdari, keni 3 minuta kohë për të na shpjeguar shkurtimisht arsyet pse jeni këtu dhe dëshironi të kandidoni për komisioner publik.

Ardian Hajdari - Faleminderit!

Besoj në CV-në time i kam të përshkruara të gjitha.

Pandeli Majko – Secili nga kolegët e ka CV-në tuaj.

Ardian Hajdari – Qëllimi, dëshira, nis që në vitin 1995, kur kam filluar punën si gjyqtar. Kam pasur gjithmonë dëshirë të jem pjesë e një rendi kushtetues, i një forme të drejtë të gjyqësorit. E kam kërkuar shpesh me aneksin e Kushtetutës, por dhe me ligjin nr.84/2016, pasi unë kam paraqitur interes dhe paraqes interes. Unë besoj se i plotësoj kushtet, i kam aftësitë profesionale, morale, etike, për të qenë objektiv, proporcional, i drejtë në vlerësimin dhe gjykimin administrativ.

Faleminderit!

Pandeli Majko – A ka pyetje nga kolegët? Jo. Dua t'ju falënderoj për mënyrën e koncentruar se si i shpjeguat arsyet pse jeni këtu.

Arte Gjonaj. Zonja Gjonaj, keni 3 minuta kohë për të na shpjeguar arsyen pse dëshironi të kandidoni për komisionere publike. Këtë mënyrën teknike të të folurit nga ana ime besoj se nuk e merrni si një lloj presingu. Kjo ngaqë po ua përsëris të gjithëve, më është bërë edhe mua si një mënyrë makinerie e të folurit.

Arte Gjonaj - Faleminderit!

Unë pyetjes suaj do t'i përgjigjesha me një pyetje. Pse të mos aplikoj? Unë mendoj se jam një individ që mbaj përgjegjësitë e mia profesionale dhe qytetare për të dhënë kontributin tim. Është një ndër mundësitë e mia për filtrimin e drejtësisë. Mendoj se korrektësia ime, profesionalizmi im, qëndrueshmëria ime në zgjidhjen e drejtë të problemeve ligjore, më bën që të jem pjesë e personave për të aplikuar dhe mendoj se duhet të jem pjesë e personave të përzgjedhur në këtë aplikim.

Pandeli Majko - Faleminderit! A ka pyetje nga kolegët?

Secili prej kandidatëve ka CV-në përpara, prandaj dhe duhet të shpreheni shkurtimisht. Nuk ka të bëjë me faktin që jemi të prirur t'ju dëgjojmë thjesht për t'ju dëgjuar apo të shprehim koncentrim, për t'i rënë sa më shkurt.

Arte Gjonaj – Unë mendoj se pika ime e fortë është besimi im në vetvete, korrektësia ime, profesionalizmi im në zgjidhjen e problemeve dhe qëndrueshmëria ime në zgjidhjen e problemeve ligjore. Kjo mendoj se është një nga pikat e mia të forta.

Ndërsa për sa i përket vlerësimit tim, unë nuk mund të bëj një vlerësim për veten. Mendoj se vlerësimin tim mund ta bëni ju në bazë të dokumentacionit dhe me bindjen tuaj të brendshme, në bazë të këtyre çfarë kam prezantuar unë.

Pandeli Majko – Dhe ju do të na mirëkuptoni në vlerësimin tonë që gjithmonë mbetet subjektiv. Asnjëherë njeriu nuk njihet në të gjitha drejtimet. Ju uroj mbarësi me gjithë zemër! Faleminderit!

Betula Toto.

Betula Toto – Përshëndetje!

Pandeli Majko – Mirë se erdhët!

Sipas rregullit, keni tre minuta kohë për të na shpjeguar se pse jeni këtu dhe dëshironi të kandidoni për komisionere publike. CV-në tuaj e ka secili nga kolegët.

Betula Toto – Po. E vetmja gjë që doja të sqaroja për herë të fundit, meqë m'u dha rasti edhe sot, është se plotësimin e dokumentacionit e bëra me vonesë, për sa i përket periudhës dyvjetore, nga viti 2000 deri më 2002, sepse Gjykata e Astit, aty ku unë kam përvojën si konsulente teknike e prokurës dhe e gjykatës, pikërisht se ishin në arkivat e vjetra viti 1999, 2000, 2001, 2002, pati pak vonesë. Kështu, për arsye që nuk vareshin nga unë, por nga gjykata,

nuk arrita ta prezantoja brenda afateve, por me sqarimet që i bëra Avokatit të Popullit, i komunikova se ky vërtetim është gati, por po lëshohet. Prandaj kërkoja kohë përtej afatit. Arrita ta prezantoj gjatë seancës dëgjimore që u zhvillua më datën 30 maj. Prandaj, meqë neni 6 i ligjit të vetingut e përcakton shumë qartë se cili është kushti, dhe kushti është 15 vjet në aktivitet, kështu, ky aktivitet është i njohur, ekziston, është i dokumentuar. Prandaj do të më vinte shumë keq në qoftë se, me gjithë këtë motivim që kam, duke ardhur edhe nga Italia, ku kam angazhime profesionale dhe realizime profesionale, arsye për të cilën dhashë të dhëna tatimore, në mënyrë që të mos kishte asnjë lloj paragjykimi për prezencën time dhe interesin që kam për këtë reformë, dedikimi që unë dua t'i jap Shqipërisë, në qoftë se më jepet ky rast, pas disa viteve shkëputje, por që nuk janë dhe shkëputje të forta, sepse kam dy vjet që ushtroj profesionin edhe në Shqipëri: kam bërë gjyqe në Gjykatën e Krimeve të Rënda, kam bërë gjyqe në Gjykatën Civile, ku kam pasur edhe mundësinë të afrohem me realitetin shqiptar, si dhe të kem mundësinë të arrij të afrohem e të jap një kontribut, nëse do të vlerësohet nga ky komision.

E fundit fare, dhe po e mbyll, është se unë kam kandiduar edhe te konkursi i magistraturës në Itali, ku kam provimin pas pesë vjetëve. Këtë jua kam vërtetuar bashkë me vërtetimin e fundit në seancën dëgjimore. Ky është edhe një rast, meqë kur u inaugurua viti gjudiciar në Torino dhe u bëra avokatja e parë shqiptare në Torino, gjë që më dha shumë kënaqësi, ishte një event, sepse edhe shtypi italian, gazeta “La Repubblica” e njohu dhe publikoi si event, meqenëse ishte një rast i rrallë për realitetin torinez. Në qoftë se do ta kisha këtë mundësi, do të ishte një rast i mirë dhe një shembull i mirë i Shqipërisë andej, edhe në konkursin e magistraturës, për të cilin jam gati për të dhënë provim në korrik të këtij viti.

Ky është një rast që m'u dha. Është një fazë tranzicioni për Shqipërinë. Është një moment shumë i rëndësishëm, ndaj pse të mos jem në këtë moment!

Por, e përsëris edhe një herë, do të më vinte shumë keq në qoftë se ky përkushtim, dhe kjo dëshirë që të aplikoj tek të gjitha organet e vetingut, e të mos jetë i kufizuar aktiviteti im, ose impenjimi im, sepse i kam dhe i plotësoj të gjitha kushtet, që kërkohen për këtë angazhim, ose në Kolegjin e Apelit, ku do të kisha dëshirë, në qoftë se do të jepja një preferencë, sepse i përmbush plotësisht të gjitha kushtet, ato që janë kushte formale, dhe nga ana efektive kam shumë dëshirë. Domethënë jam shumë e motivuar për të dhënë sa më shumë kontribut të vlefshëm për këtë vend. Them se ne kemi akoma mundësi, sidomos ne që jemi shkëputur, ndodhemi andej dhe kemi dëshirë të riafrohemi. Do të kishim dëshirë të kishim edhe mirëpritje dhe të na jepej mundësia që, konkretisht, të japim diçka, aq sa kemi përfituar atje, që Shqipëria na e kërkon. Pse jo? Për çfarë arsyeje duhet të largohem e të shmangem? Nuk kam asnjë lloj arsyeje. Them se jam shumë e motivuar, e kam edhe pasion, kam goxha pasion, se e kam

demonstruar edhe në Itali këtë. Vetëm me pasion kam arritur aty ku kam arritur, me vullnet e me pasion.

Prandaj, përse unë, në këtë moment delikat të Shqipërisë, të reformës në drejtësi, të mos përkushtohem ashtu siç jam përkushtuar tërë këto vite në Itali?! Si te mos i përkushtohem vendit tim? Dhe m'u duk absurde. Prandaj unë vendosa t'i hyj kësaj sfide, duke shpresuar tek mirëpritja dhe vlerësim nga ana juaj. Me gjithë modestinë, me gjithë dashamirësinë dhe me gjithë sinqeritetin, pa asnjë lloj interesi, pa asnjë lloj oportuniteti apo leverdie. Këtu nuk ka asnjë lloj leverdie nga ana ime. Është me të vërtetë një konstancë, është me të vërtetë një dëshirë për të kontribuar. Kjo duhet të vlerësohet, të kuptohet dhe të konsiderohet nga ana juaj.

Por, mos harroni në lidhje me këtë plotësim dokumentacioni, sa i takon punës që unë kam bërë si konsulente teknike nga viti 2000.

Pandeli Majko – Zonja Betula, në rregull! Ju kuptuam.

Betula Toto – Sepse, për një mungesë dokumentacioni që nuk varej unë, por nga vonesat e gjykatës, sepse ishin në arkivat e vjetra, do të ishte me të vërtetë për... Unë këtë gjë ia sqarova Avokatit të Popullit dhe i kërkova që të më jepte pak kohë, në mënyrë që të arrija ta prezantoja këtë vërtetim të Gjykatës së Asit, ashtu siç dhe e bëra. Por faktikisht, afatet zyrtare qenë mbyllur, e për këtë arsye unë u kufizova.

Pandeli Majko – Po. Mirë. Pyetje nga kolegët?

Evis Kushi – Faleminderit, kryetar! Faleminderit, zonja Toto!

Një pyetje kam: Ju, a do ta pezulloni ushtrimin e profesionit në Itali?

Betula Toto – Në qoftë se është e nevojshme, do ta pezulloj. Nëse ka konflikt e mospërshtatshmëri me ushtrimin e profesionit tim në Torino, në zyrën time, nuk kam pengesa në këtë anë, sepse kam mundësi të delegoj kolegë të mi, me të cilët unë bashkëpunoj. Nuk kam pengesa dhe në qoftë se kjo do të më kërkohet, do ta pezulloj.

Evis Kushi – Sepse lind pyetja tjetër: cili është interesi juaj? Ne ju falënderojmë për pjesëmarrjen tuaj, por pa dyshim që është edhe interesi subjektiv, si të themi. Ju pezulloni një veprimtari prej avokateje të suksesshme në Itali, siç thoni...

Betula Toto – Avokate e suksesshme nuk e thashë. Kam pasur realizime dhe kënaqësi. Këto kënaqësi, madje, janë më të mëdha për një njeri të huaj, që me sakrificë arrin të realizojë disa gjëra sesa për një njeri, një kandidat apo një avokat, i cili është rritur me atë frymë dhe në atë ambient, ose e ka realizuar në këtë mënyrë. Unë them se kënaqësia ime ka qenë edhe e shumëfishuar për këtë arritje. Ndërkohë që, pezullimi i profesionit nuk është një pengesë. Në qoftë se kjo gjë do të ishte kusht, unë jam gati ta pranoj. Ky mision është një mision shumë serioz, kërkon edhe një përkushtim të plotë. Prandaj është normale...

(Ndërhyrje pa mikrofon)

Faleminderit! Dakord. Ju kërkoj falje.

Pandeli Majko – Zonja Betula, të shkretët ata gjykatës që të kanë përballë në proces gjyqësor.

Zonja Betula, ju falënderoj shumë për paraqitjen tuaj!

Betula Toto – Faleminderit edhe juve!

Pandeli Majko – Ju faleminderit!

Bledar Cenameri.

Urdhëroni! Keni tre minuta kohë për të paraqitur veten tuaj dhe arsyen pse dëshironi të kandidoni për komisioner publik.

Bledar Cenameri – Faleminderit! Quhem Bledar Cenameri. Jam avokat. Ushtroj profesionin në Tiranë që prej vitit 2003. Fillimisht kam punuar në një zyrë avokatie në Romë, ku kam kryer edhe studimet e larta në Universitetin e Romës, La Sapienca.

Të them të drejtën nuk e kam menduar kurrë se do të punoja në një funksion publik. Gjithmonë kam dashur të punoj në sektorin privat, ku mendoj se kam bërë punën time. Të them të drejtën, nuk e kisha menduar asnjëherë se do të bëhej edhe vetingu, por ja ku jemi këtu sot.

Në momentin që kam aplikuar, kam menduar se, nëse do të qe e mundur ta jepja edhe unë kontributin tim modest, do të isha i lumtur. Mendoj se kam përgatitjen e duhur profesionale dhe integritetin e duhur që të kontribuoj sadopak për ta bërë këtë sistem drejtësie sa më të besueshëm për të gjithë.

Pandeli Majko – Faleminderit!

Pyetje nga kolegët?

Qartë! CV-a juaj flet më shumë se fjalët tuaja. Ju faleminderit!

Bledar Cenameri – Ju faleminderit e punë të mbarë!

Pandeli Majko – Do të fusim Fredi Mirashin jashtë radhe, sepse ka një arsye familjare. Brunilda Lilo.

Po, ju lutem, uluni!

Brunilda Lilo – Përshëndetje!

Pandeli Majko – Zonja Brunilda, keni tre minuta kohë për të na paraqitur arsyet se përse dëshironi të kandidoni për komisionere publik, përballë komisionit. Faleminderit!

Brunilda Lilo – Faleminderit edhe juve!

Në radhë të parë, impakti për këtë ose, më saktë, zgjimi i interesit tim është shkaktuar, në radhë të parë, nga tërësia e objektivave që duhet të përmbushen nga reforma në drejtësi, po flasim vetëm në cilësinë time si qytetare.

Më pas, impakti i funksionimit të sistemit të drejtësisë është edhe më i fuqishëm te ne, sepse unë bëj pjesë në një kategori profesionistësh, të cilët kanë një marrëdhënie edhe më të ngushtë me organet e drejtësisë, për shkak të formimit tim profesional.

Në radhë të tretë, unë mendoj se kombinimi i arsimimit tim, i formimit tim profesional, ekspertizës së punës, të arritur deri më sot, në vlerësimin tim përbën një kandidaturë të kënaqshme për pozicionin e komisionarit publik.

Pandeli Majko – CV-në tuaj e kanë të gjithë kolegët.

Ka pyetje?

Mirë, Brunilda, mënyra e shkurtër jo gjithmonë është një arsye për t'i thënë të gjitha, por mendoj se CV-a juaj flet më shumë se ajo që ju thatë.

Kjo është intervista e parë që keni bërë?

Brunilda Lilo – Jo. Kjo është e dyta, për këtë pozicion.

Pandeli Majko – Po, në rregull! Ju faleminderit!

Brunilda Lilo – Ju faleminderit edhe juve!

Pandeli Majko – Po, prezantohuni. Kishit një arsye familjare, prandaj dhe ju thirrëm jashtë radhe.

Brenda tre minutave na duhet një arsyetim i shkurtër lidhur me faktin se përse dëshironi të kandidoni për komisioner publik.

Fred Mirashi – Quhem Fred Mirashi. Kam një eksperiencë profesionale në sistemin e drejtësisë spanjolle, me rreth 17 vjet. Kam punuar për administratën shtetërore të Spanjës, për kryeministrin spanjoll. Kam qenë pjesë e të gjitha grupeve ndërkombëtare të forcave shumëkombëshe që kanë marrë pjesë në Shqipëri, dhe në vitin 1999 në Kosovë, si jurist i NATO-s për këto vende.

Aktualisht kemi disa projekte që realizojmë në fushat ndërkombëtare dhe jam konsulent juridik i një prej korporatave më të mëdha europiane për sa i përket sistemeve elektronike. I gjithë aktiviteti im është ushtruar në gjykatat spanjolle, në Spanjë. Në Shqipëri nuk kam punuar asnjëherë si avokat, por eksperiencia ime vjen nga sistemi juridik spanjoll; atje kam kryer universitetin për 5 vjet.

Për sa i përket kohës, nuk kam pasur mundësi që të prezantoj të gjithë dokumentacionin përkatës, sepse nuk ndodhesha fizikisht në zyrën në Madrid, isha në udhëtim në Amerikë për arsye familjare.

Besoj te ky sistem, i cili do të rinovohet, do të pastrohet nga elementë, që dihen se për çfarë jemi këtu. Kam njohuri për gjuhë të huaja, 5 gjuhë të huaja, me diplomat përkatëse.

Pas leximit të dokumentacionit dhe CV-së, nëse keni ndonjë pyetje tjetër, jam i gatshëm të përgjigjem. Në administratën shtetërore kam qenë prezent edhe në Shqipëri me kryeministrin spanjoll, kur janë lidhur marrëdhëniet me Shqipërinë, kur u hap ambasada. Kam dokument nga parlamenti spanjoll dhe Këshilli i Ministrave të Spanjës për sa i përket kontributeve të mia në marrëdhëniet Shqipëri- Spanjë. Duke filluar që nga ambasadori i parë i Spanjës në Shqipëri, kur u krijua mundësia për hapjen e marrëdhënieve mes Shqipërisë dhe Spanjës. Të gjitha këto, kontrolli i figurës, integriteti i figurës sime kanë kaluar në komisionet e kontrollit të figurës në Spanjë, përpara se të merrej vendim nga Këshilli i Ministrave në Spanjë për sa i përket nënshtetësisë. Në dokumentet e Këshillit të Ministrave të Spanjës, po të lexoni, në shkresë jepet në mënyrë të veçantë kontributi si jurist në marrëdhëniet Shqipëri-Spanjë.

Nëse keni ndonjë pyetje, jam i gatshëm të përgjigjem.

Pandeli Majko – Po, patjetër.

Po, zoti Bumçi.

Aldo Bumçi – Zoti Mirashi, keni një CV shumë të pasur, keni një përvojë të çmuar. Fakti që nuk keni përvojë pune në Shqipëri nga kjo anë është pozitive, është avantazh, sepse nuk keni konflikt interesi. Ju shprehët një vlerësim për sistemin. Nga ju buron ky vlerësim, kur ju nuk keni pasur kontakt me sistemin? Është vlerë që ju nuk keni pasur kontakt, por vlerësimi nga buron?

Fredi Mirashi – Nga këndvështrimi im si jurist, përsa i përket zbatueshmërisë së ligjit në marrëdhëniet dhe në tratativat që kam bërë me qeveritë shqiptare ndër vite, qoftë me qeverinë e PD-së edhe të PS-së, sepse është një eksperience përreth 17 vjet, në eksperiencën time nuk kemi pasur asnjëherë një zbatueshmëri të përpiktë nga ana ligjore të vendimeve të gjykatave spanjolle dhe sidomos të marrëdhënieve dypalëshe që janë nënshkruar mes Spanjës dhe Shqipërisë. Këtu buron nga ana legislative dhe juridike koncepti për zbatueshmërinë e varfër që ka sistemi juridik shqiptar në vendimet që marrin ose në zbatueshmërinë e ligjit.

Pandeli Majko – Po, zoti Fino.

Bashkim Fino- Më tërhoqi vëmendjen moszbatueshmëria e vendimeve spanjolle, a thua se vendimet e gjykatave spanjolle janë më të sakta në arsyetim sesa vendimet e gjykatave shqiptare?!

(Ndërhyrje pa mikrofon.)

Nuk kam mbaruar.

Fredi Mirashi - Më falni!

Bashkim Fino - Në rastin konkret, po bëni një mbivlerësim pavarësisht se keni punuar jashtë, por gjithsesi edhe gjykatat shqiptare nuk janë të gjitha ashtu siç mendojmë ne, ka vendime të gjykatave shumë të arsyetuara shumë të sakta, të cilat janë vlerësuar edhe në arenën ndërkombëtare. Unë mendoj se duhet ta shikojmë pak këtë gjë, të mos bëjmë krahasime të vendimeve të gjykatës, meqenëse keni punuar më shumë me Spanjën dhe nuk keni punuar fare në Shqipëri.

Fredi Mirashi - Jo, thjesht legjislacioni në të cilin bazohen vendimet e gjykatave shqiptare dhe vendimet e gjykatave spanjolle. Me thënë të drejtën legjislacioni spanjoll është shumë më i zgjeruar, përfshin shumë fusha në të cilat këtu ende nuk kemi ligje.

Për sa i përket hartimit dhe përpilimit të vendimeve, ka një bibliografi më të zgjeruar në vendimet e gjykatave spanjolle, plus kësaj fakti që spanjishtja si gjuhë...

(Ndërhyrje pa mikrofon.)

Ideja është se kur është bibliografia më e zgjeruar edhe vendimi është më i plotë.

Pandeli Majko - Zoti Mirashi, dëshiroj t'ju them diçka, një opinion timin, duke tejkaluar ndoshta kufijtë. Unë mendoj që CV-ja juaj ju bën nder juve dhe neve që ju dëgjojmë në këtë tavolinë. Askush nuk vë në diskutim cilësitë tuaja. Kam përshtypjen se CV-ja juaj flet më shumë sesa e folura juaj. Ju i bëni nder Shqipërisë atje ku jeni, besoj se ma mirëkuptoni këtë shprehje, ngandonjëherë e thoshin nëpër fshatra: “Prift në fshatin tënd është pak e vështirë të bëhesh”.

Ju faleminderit shumë që keni ardhur sot këtu!

Ju urojmë nga zemra mbarësi!

Fredi Mirashi – Kam një gjë, unë si figurë personalisht jam i vlerësuar nga shteti spanjoll për kontribute dhe kam kaluar kontrollin e integritetit të figurës, me të gjitha kontrollet që arrin një shtet serioz si Spanja.

Pandeli Majko - Po, as që bëhet fjalë.

Në fakt, ju keni punuar në disa struktura militare pranë të cilave nuk mund të punoni, nëse nuk keni ato që sapo thatë.

Fredi Mirashi - Jam njohës shumë i mirë i realitetit shqiptar, kam marrë pjesë që në vitin 1997 me forcat shumëkombëshe. Pra, kam eksperiencë në Shëngjin e të tjera ku ishin bazat, në vitin 1999, në grupet e refugjatëve në Durrës.

Pandeli Majko - I kemi parë, unë i kam parë të gjitha.

Fredi Mirashi - Në vitin 1999 kam kaluar në Kosovë dhe Prishtinë me grupet hetimore të UÇK-së nga ana e NATO-s, në bisedat hetimore të anëtarëve të UÇK-së.

Pandeli Majko- Faleminderit!

Fredi Mirashi - Faleminderit!

Punë të mbarë!

Pandeli Majko – Vazhdojmë me kandidatin tjetër, Jonida Bekteshi.

Jonida Bekteshi - Përshëndetje!

Kam mbaruar studimet e larta për drejtësi në vitin 1999. Mendoj se kam formimin profesional dhe një eksperiencë të gjatë prej 16 vjetësh në administratë dhe në institucionet e sistemit të drejtësisë.

Dëshiroj të jap kontributin tim në këto institucione të reja të sistemit të drejtësisë.

Pandeli Majko - Ka pyetje nga kolegët?

T'i biem shkurt, nëse mund të shprehem kështu, sepse çdo koleg ka CV-në e gjithsecilit që vjen këtu. Ju keni bërë një intervistë më parë.

Jonida Bekteshi - Po, në Kolegjin e Apelimit.

Pandeli Majko- Faleminderit!

Gjithë të mirat!

Vazhdojmë me kandidatin tjetër, zotin Darjel Sina.

Dariel Sina- Përshëndetje!

Pandeli Majko - Keni 3 minuta kohë për të na shpjeguar arsyen pse dëshironi të bëheni komisioner publik. Çdo koleg ka përballë CV-në tuaj.

Dariel Sina- Arsyeja është shumë e qartë. Në prag të reformës në drejtësi duke qenë se nuk jam i përfshirë asnjëherë më parë dhe duke ditur problemet që ka drejtësia shqiptare, duke parë dhe ndikimin e ndërkombëtarëve, ONM-së që morën pjesë në hartimin e të gjithë paketës ligjore, vendosa të kandidoj për pozicionin e komisionerit publik. Duke pasur edhe të gjitha studimet jashtë Shqipërisë mendoj se është rasti im që të kandidoj në këtë pozicion.

Për sa i përket CV-së, kam studiuar në Universitetin Kombëtar të...

(Ndërhyrje pa mikrofon.)

Pandeli Majko – Jo, dakord, nëse dëshironi të nënvizoni diçka të veçantë tuajën.

Dariel Sina - Jo, thjesht, studimet i kam bërë jashtë Shqipërisë. Kam një bursë ekselence si kërkues shkencor në Universitetin e Zyrihut, kam qenë më parë dekan në Fakultetin e Drejtësisë “Luarasi”. Jam përsëri drejtor i Programit Master në Fakultetin “New York” të Tiranës. Mbaj gradën “Profesor i asocuar”.

Jam i hapur për pyetje.

Pandeli Majko – Profesor, ju faleminderit!

Gjithë të mirat!

Dariel Sina - Edhe unë ju falënderoj!

Pandeli Makjo – Dedë Kasneci.

Zoti Dedë keni 3 minuta kohë për të na shpjeguar mua dhe kolegëve arsyet pse dëshironi të kandidoni për komisioner publik.

Dedë Kasneci - I nderuar zoti kryetar,

Të nderuar anëtarë të Komisionit *ad hoc* me 12 anëtarë të Përzgjedhjes,

Jam i lumtur dhe i nderuar që gjendem sot para jush në këtë seancë dëgjimore në cilësinë e kandidatit për komisioner publik.

Më lejoni që në vijim të bëj një prezantim të shkurtër të profilit tim akademik dhe profesional, duke u fokusuar në ato aspekte, merita dhe cilësi që në vlerësimin tim përbëjnë në vetvete, por ndoshta në krahasim me kandidatët e tjerë, një avantazh ose vlerë të shtuar të kandidaturës sime. Lidhur me formimin tim akademik, kam përfunduar studimet e larta për drejtësi, me rezultate të larta 9,6 nga 10. Besoj se kjo përbën një avantazh, pasi vetë ligji, neni 6, pika 2 thekson: “Të merret në konsideratë në veçanti përfundimi i fakultetit me një mesatare jo më pak se 8”. Fakti që është 16 pikë mbi minimumin që parashikon ligji, besoj se përbën një avantazh.

Unë jam ekspert, kam njohuri gjithëpërfshirëse dhe të thelluara në të drejtën e BE-së. Të gjitha studimet pasuniversitare 7 vjet i kam ndjekur në kolegje dhe universitete prestigjioze perëndimore, siç janë Universiteti i Tresës dhe Kolegji i Europës në Bryzh të Belgjikës. Në veçanti do të theksoja, se përvoja studimore në Kolegjin e Europës në Bryzh ka qenë thelbësore për mua. Siç e dini, Kolegji i Europës ofron standardet më të larta në botë të mësimdhënies në fushën e të drejtës së BE-së dhe ka një reputacion të jashtëzakonshëm ndërkombëtar. Studentët që arrijnë të mbarojnë këtë kolegji konsiderohen si studentë të ekselencës. Përveç kësaj unë jam ekspert në të drejtën e mbrojtjes së të dhënave personale dhe të privatësisë. Siç e dini, kjo është një e drejtë kushtetuese e garantuar nga neni 35 i Kushtetutës. Ka një ligj të posaçëm për të drejtën e të dhënave personale dhe ka një autoritet: Komisioneri për të Drejtën e Informimit dhe Mbrojtjen e të Dhënave Personale, i cili mbron të dhënat personale në linjë me parashikimet e ligjit.

Në vlerësimin tim avantazhet e mia në vetvete, në krahasim me kandidatët e tjerë, është fakti, ekspertiza ime që kam në një fushë të caktuar të së drejtës: e drejta europiane dhe e drejta e mbrojtjes së të dhënave personale, pasi vetë ligji parashikon se kanë përparësi kandidatët që kanë ekspertizë të fushës së caktuar të së drejtës. Qëllimi i kësaj norme është të shmanget përqendrimi i ekspertizës, që jo të gjithë kandidatët të jenë të kualifikuar në një fushë të caktuar të së drejtës, por të ketë një shpërndarje për të pasur një ekspertizë të anëtarëve që do të zgjidhen në këto institucione.

Gjithashtu, mendoj se përbën avantazh edhe fakti që unë i kam mbaruar studimet pasuniversitare në universitete perëndimore dhe në ligj thuhet që merret në konsideratë përvoja studimore jashtë shtetit.

Për sa i përket përvojës sime profesionale, do të theksoja se prej mbi 10 vjetësh jam nëpunës i nivelit të mesëm dhe të lartë drejtues në administratën e Kuvendit. Në vitet 2007-2010 kam qenë këshilltar në Shërbimin e Përafrimit të Legjislacionit dhe nga viti 2010 e në vijim jam drejtor i këtij Shërbimit.

Si këshilltar i parë dhe drejtor kam pasur mundësinë të jap kontributin tim me ngritjen dhe vënien në eficiencë të plotë të këtij shërbimi në Kuvend. Kam hartuar përshkrimin e punës, formatin dhe elementet përmbajtësore të analizave ligjore që prodhon ky shërbim.

Të nderuar deputetë, siç e dini, ky shërbim ka për mision t'i ofrojë Kuvendit asistencën tekniko-ligjore në procesin e përafrimit të legjislacionit shqiptar me legjislacionin e Bashkimit European.

Për sa i përket përvojës sime profesionale, besoj se dy janë avantazhet e mia: përvoja ime në ngritjen dhe vënien në eficiencë të kësaj strukture të re në administratën e Kuvendit, e cila besoj se do të më vlejë nëse marr votëbesimin tuaj, si dhe fakti që gjatë periudhës sime prej mbi 16 vjet punë, kam vlerësimet maksimale nga eprorët e mi.

Të nderuar deputetë, më lejoni të them dy fjalë si është perceptimi im për institucionet e rivlerësimit kalimtar, meritat, llogaritë dhe cilësitë që duhet të kenë kandidatët.

Sistemin e vlerësimit kalimtar të gjyqtarëve dhe prokurorëve në Republikën e Shqipërisë e konsideroj si një sistem kyç.

Pandeli Majko – Zoti Dedë, do të flisni vetëm për veten tuaj. Besoj se më mirëkuptoni.

Dedë Kasneci – Po.

Pandeli Majko – Keni ndonjë vlerësim tjetër, ndonjë gjë të veçantë që dëshironi t'ua shpjegoni kolegëve?

Dedë Kasneci – Jo.

Unë i konsideroj të rëndësishme edhe disa cilësi të tjera, përveç përvojës profesionale, formimit akademik.

Pandeli Majko – Nuk e vë në dyshim.

Dedë Kasneci – Në ...*(nuk dëgjohet)* tim është integriteti, pavarësia, paanshmëria dhe vendosmëria.

I nderuar kryetar, besoj se i plotësoj këto kritere, besoj se kam integritetin e duhur, ndershmërinë intelektuale, forcën dhe rigorozitetin e duhur moral për ta përmbushur detyrën.

Gjithashtu, kam pavarësi në paanësi për t'i trajtuar çështjet me paanësie, pavarësisht nga çështjet që trajtohen, objekti i çështjes, si dhe palët e përfshira. Besoj se kam edhe vendosmërinë e duhur për të marrë vendime të vështira me vendosmëri dhe gjithmonë me interes publik.

Për të gjitha këto arsye, të nderuar deputetë, kam bindjen se ju do ta gjeni kandidaturën time të përshtatshme për komisioner publik.

Gjithashtu, kam bindjen se e meritoj të ma jepni këtë mundësi për të dhënë kontributin tim në këtë proces.

Jam i disponueshëm për çdo pyetje që ju mund të keni.

Faleminderit!

Pandeli Majko – Ka pyetje nga kolegët? Nuk ka.

Të falënderoj dhe të uroj mbarësi!

Dedë Kasneci – Faleminderit!

Pandeli Majko – Edlira Bylo.

Zonja Edlira, keni 3 minuta kohë për të na shpjeguar arsyet pse dëshironi të jeni komisionere publike.

Edlira Bylo – Faleminderit!

Quhem Edlira Bylo Gabova. Kam punuar si avokate, përfaqësuese ligjore pranë organizatave jofitimprurëse me target grupe gra, vajza, fëmijë me aftësi të kufizuara dhe të vonuar. Jam dhe kam qenë pjesë e programeve të rëndësishme, si UNDP, Just USAID dhe Civil Rights Defenders.

Përvoja me programet Just dhe UNDP ka sjell në fokus njohjen dhe përvojën me organet e drejtësisë. Shqetësimi im lidhet me organet që do të mbështesin viktimat e dhunës në betejat e tyre personale për jetën më shumë se çdo institucion tjetër, sidomos gratë dhe të miturit, të cilët shpesh paragjykohen në të drejtën e tyre nga organet e Policisë Gjyqësore dhe prokurori.

Problematikat që kam ndeshur janë shkelja e procedurave për njoftimet dhe afatet; marrja në pyetje e të pandehurit shpeshherë rezulton e sforcuar, me shkelje të tilla duke mos u marrë në pyetje nga prokurori, por vetëm nga oficeri gjyqësor, duke firmosur pa u njohur me prova dhe fakte, i pandehuri ose një person që bën kallëzim në prokurori nuk pajiset me një kopje të dokumentacionit, viktimat nuk pajiset me kopjen e kallëzimit që bën; akte të gjeneruara nga oficerët gjyqësorë janë shpesh të formuluar dobët, janë copë-copë, të mbushura me gabime, kur duhet të jenë prova kryesore në procesin penal.

Nga ana tjetër, shqetësimi më i madh që unë kam ka të bëjë me oficerët gjyqësorë, prokurorët dhe përfaqësuesit e drejtësisë, të cilët nuk e kanë formimin e duhur dhe shpesh abuzojnë me procedurat, të cilat rezultojnë diskriminuese, sidomos në rastet e viktimave të dhunës, kur personat janë në hetim, janë gra ose të mitur.

Gratë dhe vajzat, në cilësinë e të pandehurave ose viktimat në cilësinë e kallëzuesit trajtohen në mënyrë diskriminuese, pa respekt nga oficerët gjyqësorë, fajësohen, u induktohet frika dhe autoriteti mashkullor, sepse janë femra ose të mitur pa eksperiencë.

Të pandehurat ose viktimat detyrohen t'i nënshtrohen një interogatori 4-5 orësh, ku janë të detyruara të dëgjojnë nofka dhe epitete të tilla, si: sillesh si hysterike, e paafte për të kuptuar, je e metë, femra është djall, ti je gruaja e atij pijanecit, ose, në rastin me të mirë, të profesionistëve, japin edhe vlerësime të pakërkuara për mënyrën se si e ushtrojnë profesionin.

Pandeli Majko – Zonja Bylo, mos u shqetësoni!

Ne e kuptojmë shumë mirë CV-në tuaj, secili nga kolegët e ka përpara dhe ajo flet më shumë.

Edlira Bylo – Patjetër, do të jem e qetë. Kam edhe shumë pak dhe do të jem e koncentruar.

E pandehura ose i pandehuri nxiten për të kundërvepruar dhe për të fyer, gjithashtu, me dëshirën për t'i shërbyer drejtësisë. Nën moton që ka të drejtën të përdorë çdo mjet gjatë hetimit, oficeri gjyqësor shkel etikën profesionale dhe Kodin Penal me të dyja këmbët, duke harruar se tallja, fyerja e dinjitetit, etiketimi i personit, nxitja për të shkelur ligjin përbëjnë vepra penale, të cilat kalojnë pa u ndëshkuar në shumicën e rasteve.

Kur viktimat e dhunës ankohen dhe bëjnë denoncime për bashkëshortët, përgjigja që vjen nga oficeri është: “E bën, sepse është xheloz për ty, të do shumë domethënë”.

Mbyllen hetimet për dhunuesit kur i kalon prokurorisë, duke e vënë akoma më tepër në rrezik jetën e viktimës, e cila është ekspozuar mjaftueshëm në momentin e denoncimit dhe konfrontimit me dhunuesin para institucioneve.

Pse jam unë këtu? Jam këtu sepse kam dëshirë që drejtësia për këtë kategori të vihet në vend dhe dua të jem pjesë e këtij mekanizmi. Jam këtu sepse e gjithë kjo duhet të marrë fund.

Ju falënderoj shumë për mundësinë që më keni dhënë për t'u dëgjuar sot!

Pandeli Majko – Ka pyetje nga kolegët? Nuk ka.

Faleminderit dhe ju uroj mbarësi!

Edlira Bylo – Faleminderit dhe punë të mbarë!

Pandeli Majko – Edmond Kasmi.

Zoti Edmond, keni 3 minuta kohë për të na thënë arsyt pse dëshironi të jeni komisioner publik. E keni parasysh se 3 minuta nuk ka të bëjnë me paragjykim, por me faktin që secili nga ne, anëtarët e komisionit, e kemi CV-në tuaj përpara.

Edmond Kasmi – Faleminderit!

Mendoj se jam i përshtatshëm për këtë pozicion, sepse e dëshiroj.

Shtysa ime e parë ishte thirrja “Kush është patriot, të aplikojë”. Më duket një moment historik për ne.

Kam përvojë në administratë dhe në gjykatë.

Këto janë pak a shumë.

Shpresoj të më votoni!

Pandeli Majko – Ju ka sjellë vetëm patriotizmi?

Edmond Kasmi – Pa diskutim.

Pandeli Majko – Nuk besoj se e morët si batutë negative.

Ju falënderoj shumë që keni ardhur sot!

Edmond Kasmi – Faleminderit edhe ju!

Pandeli Majko – Ju uroj mbarësi!

Vazhdojmë me Eljona Lloja.

Zonja Eljona, keni 3 minuta kohë për t’u shpjeguar kolegëve pse dëshironi të jeni komisionere publike. CV-ja juaj është përpara secilit prej kolegëve dhe kjo është arsyeja pse kemi lënë një kohë kaq të shkurtër për shpjegime.

Përveç të tjerash, ju keni qenë edhe në komision tjetër.

Eljona Lloja – Përshëndetje.

Në radhë të parë, ndihem e vlerësuar që jam pjesë e këtij paneli sot!

Arsyeja pse unë kam aplikuar në pozicionin e komisionerit publik është, së pari, integriteti i figurës i krijuar për gjithë këta vjet, jo vetëm pasi kam mbaruar juridikun, por që nga momenti që kam kuptuar se çfarë është të jesh një qytetar. Besoj se ky është një aset që i vihet në dispozicion këtij komisioneri, sepse nuk mund të kesh të drejtë morale të kontrollosh dikë tjetër, në qoftë se figura jote ka diçka ku mund të cenohesh.

Përveç kësaj, është pjesa e profesionalizmit, duke qenë se përveç eksperiencës në shoqërinë civile, kam 10 vjet në Inspektoratin e Deklarimit. Duke qenë se nuk ka pasur një pozicion tjetër të përshkruar, atje kam mbajtur gjithmonë pozicionin e kontakteve me publikun.

Gjithashtu, pika e fortë besoj se është ekspertiza në fushën e konfliktit të interesit, një fushë e re, në të cilën ka shumë pak njohuri specifike. Gjithmonë përdoret ky term, por nuk njihet çfarë është realisht, pasi për 10 vjet kam qenë trajnuese për konfliktin e interesit.

Unë vazhdoj ende pranë shkollës së administratës publike si trajnuese për etikën, antikorrupsionin dhe konfliktin e interesit.

Gjithashtu, emri im është në të gjitha manualët, si hartuese e tyre për konfliktin e interesit. Duke qenë se një ndër pikat kryesore me anë të të cilave vlerësohen personat në veting është konflikti i interesit, besoj se është një prurje, një ekspertizë që do ta vë në dispozicion të pozicionit që aplikoj.

Pandeli Majko – Ka pyetje nga kolegët? Nuk ka.

Të uroj mbarësi, Eljona!

Eljona Lloja – Faleminderit!

Gjithashtu, edhe ju!

Pandeli Majko – Gjithë të mirat!

Elvis Zaimi.

Zoti Elvis, ne të gjithë e kemi CV-në tuaj përpara. Keni 3 minuta kohë për të na shpjeguar pse doni të jeni jo vetëm komisioner publik, por edhe për pozicionet e tjera për të cilat dëshironi të kandidoni.

Jeni intervistuar në një komision më parë dhe ky është komisioni i dytë.

Fjala është për ju.

Elvis Zaimi – Për të qenë anëtar i organeve që do të kryejnë procesin e vlerësimit kalimtar të magistratëve shqiptarë më ka motivuar dëshira për të vënë në dispozicion të këtij procesi të rëndësishëm, që ka një objektiv jetik për funksionimin e shtetit të së drejtës, njohuritë e mia, siç ato dëshmohen edhe në karrierën time.

U kam përkritur gjithmonë profesionalistëve, njerëzve me një karrierë besoj të spikatur nga ana profesionale dhe nga ana etike. Kam njohuri të thelluara në fushën e së drejtës bankare dhe financiare, që do të ishte një kontribut i rëndësishëm për një nga komponentët më të rëndësishëm të procesit, që është vlerësimi dhe kontrolli i pasurive, një proces që duhet kryer me objektivitet, jo thjesht formalist dhe të krijojë besueshmërinë që vërtet njerëzit që posedojnë pasuri, që nuk arrijnë dot t'i shpjegojnë me mendimin e shëndoshë, jo thjesht me një logjikë formale dhe juridike. Sot dihet që pasuritë e paligjshme nuk janë në ato kategori tradicionale të pasurive të paluajtshme të dukshme për të gjithë, por është në formën e letrave me vlerë, pasqyrohet në forma virtuale, në sisteme pagesash, në sisteme letrash me vlerë. Kjo kërkon një aftësi gjykimi analitik, që unë e kam fituar nga eksperiencia ime dhe e kam demonstruar, sepse kam qenë përgjegjës sektori për çështjet bankare në vitin 2008, në kohën e krizës ndërkombëtare financiare, kohë kur na është dashur të marrim vendime shumë të rëndësishme; kërkohet një gjykim empirik, analitik.

Po ashtu, besoj se kjo është një anë e procesit. Domethënë, procesi duhet të jetë qasja, duke pasur parasysh se këtu po gjykohen jo qytetarë të zakonshëm, por gjyqtarë. Pra, duhet të ketë një skepticizëm profesional, skaneri duhet të jetë i plotë. Gjyqësori shqiptar vuan nga formalizmi gjyqësor, vuan nga arsyetimet skematike dhe duhet të fokusohet te mjeshtëria e karakterizimit të fakteve në raste individuale. Domethënë, gjyqtarët duhet të japin drejtësi që është e pranueshme për shoqërinë. Ndryshimet kushtetuese këtë mesazh na japin. Ato ndryshime kushtetuese janë ngritur mbi një prezumim, që shoqëria shqiptare nuk është e qetë me këtë gjyqësor që ka dhe vendimet gjyqësore nuk duhet të duartrokiten për koherencën e tyre të brendshme logjike, por duhet të duartrokiten nga opinioni i gjerë shoqëror për mesazhet që ato transmetojnë në shoqëri. Ne duam një shoqëri të shëndetshme dhe një shoqëri të shëndetshme e realizon vetëm një gjyqësor që është me të vërtetë i pavarur dhe për të shkuar te pavarësia duhet profesionalizëm i mirëfilltë.

Nga ana tjetër, ky proces, që është delikat, duhet që në çdo rast individual të bëjë drejtësi të individualizuar. Kjo do të ishte, natyrisht, një kosto për procesin në qoftë se, në emër të një fushate kundër gjyqtarëve të korruptuar, për rastet individuale, të mos bëhej drejtësi. Pra, ai që e bën gjykimin duhet të ketë, njëkohësisht, aftësi dhe qasje skeptike analitike ndaj subjektit të rivlerësimit, por, nga ana tjetër, kjo duhet të jetë e kundërbalancuar me domosdoshmërinë për ta respektuar atë.

Unë e kam këtë eksperiencë, e njoh përqasjen e Gjykatës Europiane të të Drejtave të Njeriut, di se si ajo i vlerëson provat, se si ajo arrin të krijojë balancën e duhur dhe të drejtë, që ligji të arrijë objektivin dhe pritshmëritë që ka shoqëria shqiptare.

Pandeli Majko – Ka pyetje nga kolegët?

Zoti Elvis, ju uroj mbarësi!

Elvis Zaimi – Faleminderit!

Pandeli Majko – Gjithë të mirat!

Enkeleda Goxhaj.

Zonja Enkeleda keni 3 minuta kohë për të shpjeguar arsyet përse jeni këtu dhe dëshironi të kandidoni për komisioner publik. Koha e shkurtër në dispozicion lidhet me faktin se ju jeni intervistuar edhe në një komision tjetër dhe të gjithë kolegët e kanë CV-në tuaj para.

Fjala për ju.

Enkeleda Goxhaj - Përshëndetje!

Në lidhje me sa më parashtruat, unë do të parashtroj në mënyrë të përmblodhur. Unë vlerësoj se jam një nga kandidaturat e mira për të qenë pjesë e organeve të rivlerësimit kalimtar

të gjyqtarëve dhe prokurorëve, duke vlerësuar se i përmbush të gjitha kriteret qoftë ato etike, por edhe ato profesionale.

Unë jam një subjekt me integritet dhe gjatë të gjitha viteve të mia të punës jam karakterizuar nga korrektesa, përgjegjshmëria e lartë në punë, gjithashtu edhe nga objektiviteti. Unë jam shumë ambicioze dhe synoj të punoj në strukturat më të larta të sistemit të drejtësisë. Gjithashtu, besoj shumë në funksionimin e këtij ligji për një sistem të pavarur të drejtësisë dhe në rikthimin e besimit të popullit shqiptar për sistemin e drejtësisë.

Për të gjitha këto arsye dhe për faktin se aktualisht prej afro 5 vjetësh punoj në Avokaturën e Shtetit, vlerësoj se i kam perfeksionuar edhe më shumë aftësitë e mia profesionale për të qenë një nga kandidaturat e mundshme në Komisionerin Publik, për të cilin unë i përmbush kriteret.

Në mënyrë të përmbledhur këto janë arsyet për të cilat vlerësoj se i përmbush të gjitha kriteret etike dhe ato profesionale, si një nga kandidaturat e mundshme fituese.

Pandeli Majko – Mos u shqetësoni, e folura shkurt nuk ka të bëjë me shfaqje dobësie në këtë komision të paktën, përkundrazi.

Ka pyetje nga kolegët?

Faleminderit!

Enkeleda Goxhaj - Faleminderit!

Punë të mbarë!

Pandeli Majko – Mbarësi!

Eriona Canaj.

Zonja Eriona keni 3 minuta kohë për t’u shpjeguar kolegëve arsyen pse dëshironi të kandidoni për komisioner publik. Koha e shkurtër lidhet edhe me faktin se ju jeni intervistuar edhe në një komision të mëparshëm. Secili nga kolegët e ka CV-në tuaj para.

Eriona Canaj – Faleminderit!

Quhem Erjona Canaj, jam diplomuar në universitetin “La Sapienza” në Romë, Itali. Aty kam vazhduar studimet master dhe doktoraturën, ndërkohë që titullin “Profesore e Asociuar” e kam marrë pranë Fakultetit të Drejtësisë në Universitetin e Tiranës.

Aktualisht jam përgjegjëse e Departamentit të të Drejtave Publike pranë Fakulteti i Drejtësisë në Universitetin Europian të Tiranës. Unë kam shprehur interesin tim për të marrë pjesë në organet e vetingut, pasi mendoj se mund të jem një kontribut në kuadër të reformës në drejtësi pikërisht në organet e vetingut. Unë kam aplikuar vetëm për komisioner publik për shkak se vjetërsia ime në punë është 12 vjet, kështu që vetëm për këtë pozicion unë vërtet i plotësoj kushtet dhe kriteret.

Pandeli Majko – Pyetje nga kolegët?

Profesoreshë, CV-ja juaj flet më shumë sesa fjalët tuaja.

Eriona Canaj – Faleminderit!

Punë të mbarë!

Pandeli Majko – Faleminderit juve dhe mbarësi!

Etleva Paplekaj.

Zonja Etleva keni 3 minuta kohë për t’u shpjeguar kolegëve dhe komisionit përse dëshironi të kandidoni për pozicionet që ju dëshironi. Ju jeni përzgjedhur dhe jeni intervistuar edhe në një komision tjetër. Secili nga kolegët e ka CV-në tuaj para dhe kjo është arsyeja që limiti i kohës është 3 minuta, ndaj dhe mos e merrni këtë si një lloj presioni negativ.

Etleva Paplekaj – Jo, absolutisht!

Pandeli Majko – Fjala për ju.

Etleva Paplekaj – Përshëndetje të gjithëve!

Siç e thatë dhe ju zotëri, CV-ja ime është përpara jush dhe arsyeja përse kandidoj lidhet me aftësitë e mia profesionale. Unë e kam marrë këtë si një shërbim. Përderisa vlerat dhe aftësitë e mia profesionale ju mund t’i shikoni nëpërmjet CV-së, unë do të them pse kam aplikuar, sepse kam punuar gjithë jetën, siç e tregon edhe CV-ja ime. Personat që më njohin mua e dinë mirë që në qoftë se një çështje e shqyrton Etleva Paplekaj, ajo mund të jetë e vështirë, por do të jetë ajo çfarë është e drejta. Kam frikë Zotin! Kam punuar për të mos pranuar gjëra që më verbojnë sytë për të dhënë drejtësi dhe për të korrptuar fjalët. Kam investuar gjithë jetën për këtë gjë.

Pandeli Majko – Pyetje nga kolegët?

Zonja Etleva, ki parasysh se politikanët janë mëkatarë të mëdhenj.

Etleva Paplekaj – Ju kuptoj, por Zoti bën mrekulli.

Pandeli Majko – Të uroj mbarësi!

Etleva Paplekaj – Faleminderit!

Punë të mbarë!

Pandeli Majko – Përderisa tha Zoti, diçka do t’i thosha asaj, sepse ne nuk jemi Zoti. Ajo vërtet dukej se ishte një grua e sinqertë dhe reflektonte mirësi.

Eva Dyrmishi.

Zonja Eva ju jeni intervistuar në një komision të mëparshëm. Secili nga kolegët e ka para CV-në tuaj para. Unë do t’ju lutesha brenda 3 minutave të na shpjegoni arsyet përse dëshironi të jeni komisioner publik.

Kohën 3 minuta mos e merrni si presion negativ, por kjo lidhet me faktin se ju jeni intervistuar dhe CV-ja juaj është para nesh.

Eva Dyrmishi – Faleminderit, zoti kryetar!

Atëherë, dëshira ime për të konkurruar si komisioner publik nisët nga fakti i karrierës sime profesionale, nga përkushtimi që kam pasur në zbatimin e detyrave dhe ngarkimin e përgjegjësisë, si dhe nga besimi në këtë ndërmarrje që është marrë për rikthimin e besimit të publikut te sistemi i drejtësisë dhe pavarësisë së këtij sistemi.

Gjatë karrierës sime profesionale do të ndalesha shkurtimisht dhe do të vlerësoja karrierën time si avokate, duke qenë se kam qenë pjesë e gjyqësorit dhe jam marrë me vlerësimet e vendimeve gjyqësore gjatë ankimeve apo rekurseve që kam ushtruar. Gjithashtu, do të vlerësoja qenien time si Avokate e Shtetit prej 2 vjetësh, funksion të cilin vazhdoj ta ushtroj edhe tani me përfaqësime në Gjykatën e Lartë. Gjithashtu, do të vlerësoja edhe kontributin tim si eksperte e jashtme pranë Komitetit Shqiptar të Helsinkit, në të cilin kam marrë pjesë në studime të ndryshme në lidhje me vendimet gjyqësore.

Kjo ishte pak a shumë e përmbledhur.

Pandeli Majko – Pyetje nga kolegët?

Dhurata Çupi (Tyli) - Zonja Dyrmishi, faleminderit që jeni këtu!

Pyetja është e shkurtër. Nga viti 2015 e në vazhdim ju jeni në Avokaturën e Shtetit. Cila ka qenë rruga e rekrutimit pranë Avokaturës së Shtetit?

Eva Dyrmishi – Rruga e rekrutimit ka qenë ajo me konkurrim dokumentacioni dhe me CV, që janë marrë nga titullarja e institucionit, e cila ka përzgjedhur 3-4 kandidatë të vlefshëm dhe më pas jam emëruar në këtë detyrë.

Dhurata Çupi (Tyli) - Është shpallur pozicioni juaj?

Eva Dyrmishi – Unë kam ardhur në dijeni, jo nuk është shpallur në mënyrë publike.

Dhurata Çupi (Tyli) - Faleminderit!

Eva Dyrmishi – Faleminderit juve!

Pandeli Majko – Nuk besoj se kishte një tentativë negativiteti, sepse CV-ja juaj flet më shumë sesa fjalët.

Ju falënderoj shumë!

Mbarësi!

Eva Dyrmishi – Faleminderit!

Punë të mbarë!

Pandeli Majko – Fatmira Luli.

Zonja Luli, ju keni 3 minuta kohë për të na shpjeguar përse dëshironi të kandidoni për të gjitha pozicionet që janë hapur në konkurrim. Sigurisht që jeni marrë edhe më parë në intervistë në një komision parlamentar. Secili nga kolegët e ka para CV-në tuaj dhe kjo është arsyeja pse koha është 3 minuta, për të na shpjeguar shkurtimisht arsyet, për të tjera ne kemi CV-në tuaj.

Fatmira Luli – Faleminderit!

Unë kam paraqitur kërkesë për të marrë pjesë në organet e vlerësimit të gjyqtarëve dhe prokurorëve, sepse jam e motivuar, duke njohur problematikën që ka sot sistemi gjyqësor, nisur nga eksperiencia ime personale në sistemin gjyqësor brenda sistemit si gjyqtare në Shkollën e Magjistraturës, në Ministrinë e Drejtësisë dhe, së fundi, si avokate. Unë i njoh më mirë se kushdo tjetër, gjykoj, problemet reale që kanë gjykatat dhe prokuroritë. Në këto kushte kam vlerësuar se është e rëndësishme të jap kontributin tim në këtë proces.

Pandeli Majko – Aktualisht jeni edhe pedagoge e së Drejtës Familjare në Shkollën e Magjistraturës, apo jo?

Fatmira Luli – Po.

Pandeli Majko – Mendoj se duhet ta kishit thënë këtë, por unë e thashë vetë, sepse kam CV-në tuaj.

Fatmira Luli – Meqenëse e përmenda Shkollën e Magjistraturës, nuk doja të ndalesha shumë për shkak se ju keni CV-në me cilësitë. Unë kam punuar në Shkollën e Magjistraturës dhe në Ministrinë e Drejtësisë në kontrollin e gjyqësorit.

Pandeli Majko – Gjithçka çfarë thoni këtu regjistrohet, prandaj u përpoqa të bëja një përjashtim.

Fatmira Luli – Këto janë arsyet për të cilat gjykoj se kam eksperiencën e duhur për të marrë pjesë në këtë vlerësim, që e kam bërë më parë në të gjitha proceset ku kam punuar dhe kam treguar integritet, vlerësime të cilat ju i keni në dosje.

Pandeli Majko – Nga kolegët ka ndonjë pyetje?

Faleminderit dhe mbarësi!

Fatmira Luli – Faleminderit!

Pandeli Majko – Firdes Shuli.

Zonja Shuli, do t'ju lutesha shkurtimisht për një periudhë kohe, që ne e kemi për të gjithë kandidatët, prej 3 minutash, të na shpjegoni arsyet përse kandidoni për të gjitha pozicionet që janë hapur në konkurrim nga Kuvendi i Shqipërisë. Ju jeni marrë në intervistë nga komisionet e tjera dhe kjo është arsyeja që koha është e limituar. Secili nga kolegët e ka CV-në tuaj para.

Fjala për ju.

Firdes Shuli – Faleminderit!

Unë jam Firdes Shuli dhe vij nga Gjirokastra. Kam kandiduar për të qenë pjesë e institucioneve të rivlerësimit për shkak se kam parë se i përmbush të gjitha kriteret që parashikon ligji “Për rivlerësimin kalimtar të gjyqtarëve dhe prokurorëve”. Unë do të përmend shumë pak prej tyre.

Së pari, unë kam një eksperiencë pune prej 29 vjetësh në sistemin e drejtësisë, nga të cilat 8 vjet i kam si gjyqtare në rrethin e Gjirokastrës, për një periudhë prej 3 vjetësh si kryetare e gjykatës dhe 5 vjet si gjyqtare, dhe rreth 21 vjet si notere në Gjirokastrë.

Arsyeja tjetër është se unë jam larg politikës, kam qenë larg politikës në çdo moment të jetës sime, si dhe nuk kam konflikt interesi. Ndoshta për shkak të natyrës së punës sime si notere kam qenë gjithmonë larg gjyqtarëve dhe prokurorëve. Kjo do të thotë se unë nuk kam më të voglin detyrim ndaj cilitdo gjyqtari, prokurori ose ndonjë personi tjetër që mund të më komprometojë sadopak në ushtrimin e detyrave të mia, nëse do të më jepen. Nëse do të zgjidhem, besoj se do të jap një kontribut të çmuar në rivlerësimin kalimtar të gjyqtarëve dhe prokurorëve.

Pandeli Majko – Ka pyetje?

(Ndërhyrje pa mikrofon.)

Nuk do të flasim, jemi në konflikt interes të dy, si unë, ashtu edhe zoti Fino.

Ju uroj mbarësi!

Firdes Shuli – Faleminderit!

Pandeli Majko – Gjithë të mirat!

(Ndërhyrje pa mikrofon.)

(Mungesë regjistrimi.)

Zoti Florjan, keni tri minuta kohë për të na shpjeguar arsyet se përse dëshironi të kandidoni për Komisioner Publik.

Fjala është për ju!

Florjan Ballhysa – Së pari, arsyet lidhen me *background*-in tim. Kam mbaruar Fakultetin e Drejtësisë në Tiranë, në vitin 2001. Po ju them edhe mesataren, meqë është kriter objektiv në vlerësimin tuaj gjatë përzgjedhjes së kandidatëve, kam mbaruar me mesatare 9,7. Kam kryer studimet në Shkollën Pasuniversitare për Studime Europiane me titullin “Master ekzekutiv”. Pas përfundimit të studimeve akademike kam punuar për disa vjet si oficer ligjor pranë disa organizatave ndërkombëtare. Më pas kam punuar si avokat në Dhomën e Avokatisë, Tiranë. Kam pasur mundësinë të punoj edhe në Ministrinë e Drejtësisë si këshilltar dhe drejtor

i kabinetit të ministrit të Drejtësisë. Më pas kam qenë këshilltar ligjor në Gjykatën e Lartë dhe në Gjykatën Kushtetuese. Kam pasur nderin të punoj si këshilltar ligjor pranë Shërbimit Juridik si nëpunës civil i administratës publike të Kuvendit të Shqipërisë. Prej dy vjetësh jam konsulent i pavarur ligjor, duke u ofruar shërbime ligjore organizatave të ndryshme ndërkombëtare dhe institucioneve të pavarura në vend. Mund t'ju them që bashkëpunoj me organizata të tilla, si prezenca e OSBE-së në Shqipëri, Këshilli i Europës, ambasada zvicerane, si dhe EURALIUS-i.

Pandeli Majko – Zoti Florjan...

Florjan Ballhysa – Urdhëro!

Pandeli Majko – Ju keni qenë këshilltar i Komisionit të Ligjeve.

Florjan Ballhysa – Po, zoti Majko.

Pandeli Majko – Të vetmin mendim negativ që ruajmë për ju është fakti që na braktisët, na latë si këshilltar i komisionit, sepse keni qenë vërtet një jurist i vlefshëm!

Florjan Ballhysa – Ju faleminderit!

Pandeli Majko – Duke qenë se kolegët ju njohin, po ashtu edhe unë, ndihemi pak në konflikt interesi.

Dëshirojmë ta mbylлим këtu, duke ju uruar mbarësi në votim!

Florjan Ballhysa – Ju falënderoj!

Pandeli Majko – Gjithë të mirat!

Atëherë, vazhdojmë me Genc Bilalin.

Nuk ka ardhur Genc Billali?

Dakord.

Vazhdojmë me Genta Tafën.

Zonja Genta keni tri minuta kohë për të shpjeguar arsyet përse jeni këtu dhe dëshironi të kandidoni për të gjitha pozicionet që janë shpallur nga Kuvendi i Shqipërisë. Sigurisht, ju jeni intervistuar edhe nga një komision tjetër. Secili nga kolegët ka CV-në tuaj përpara. Kjo është arsyeja pse koha është e limituar në tri minuta dhe ky nuk është ndonjë presion negativ.

Fjala është për ju!

Genta Tafa – Dakord.

Faleminderit!

Unë jam juriste që nga viti 1993, kur kam marrë edhe këtë titull nga diploma. Sot jam “Profesore e asociuar”. Mendoj se e meritoj përzgjedhjen për shkak se aftësitë e mia, të cilat tregohen edhe me anë të CV-së, janë të ndryshme nga ato të kandidatëve të tjerë, megjithëse i

vlerësoj të gjithë pjesëmarrësit. Arsyeja është se kam eksperiencë shumë të gjatë në fushën e mësimdhënies dhe kjo më ka bërë, le të themi, specialiste në vlerësimin e aftësive të të tjerëve.

Së dyti, jam e specializuar në fushën e së Drejtës Financiare dhe Bankare, që do të thotë se kam aftësi të posaçme për të lexuar deklaratat e pasurive, për të bërë verifikime për mënyrën se si janë paguar detyrimet ndaj shtetit.

Së treti, unë punoj pothuajse prej katër vjetësh si përmbartuese gjyqësore private, ku kam mësuar se si funksionojnë pronat, pasuritë e paluajtshme, si dhe pasuritë e luajtshme.

Kam një karrierë pothuajse 20-vjeçare si juriste. Mendoj se i plotësoj të gjitha kriteret për të qenë pjesë e këtyre organeve të reja. Për këtë arsye kam aplikuar në të gjitha pozicionet, duke menduar se ku do të gjendet vendi më i përshtatshëm. Mendoj se pika ime më e fortë është integriteti.

Pandeli Majko – Ka pyetje nga kolegët?

Profesore, ju uroj më të mirën!

Genta Tafa – Faleminderit!

Pandeli Majko – Gjithë të mirat!

Vazhdojmë me Gentjan Gurrën.

Pandeli Majko – Zoti Gentjan, keni një afat kohor prej tri minutash për të treguar shkurtimisht përse dëshironi të kandidoni për komisioner publik.

Ju jeni intervistuar nga një komision i mëparshëm. Secili nga kolegët ka CV-në tuaj përpara. Kjo është arsyeja përse koha është e shkurtër, tri minuta. Mos e merrni në sensin negativ.

Fjala është për ju!

Gentjan Gurra – Së pari, faleminderit për mundësinë që më jepni!

Do të mundohem ta përmbledh në tri minuta gjithë atë që dua të them në të vërtetë.

Atëherë, shtysa kryesore përse kam vënë emrin dhe karrierën time në dispozicion të këtij procesi është qëllimi kushtetues i kësaj ndërmarrjeje të paprecedentë që Shqipëria po përjeton. Është një qëllim që përtej funksionimit të shtetit të së drejtës, sigurimit të pavarësisë së sistemit, ka të bëjë me rikthimin e besimit të publikut te ky sistem. Duke besuar se profili im përshtatet pikërisht me këtë qëllim kushtetues, kam vendosur të aplikoj.

Profili im profesional përshtatet, sepse unë nuk jam dhe nuk kam qenë asnjëherë pjesë e sistemit. Nuk jam pjesë e administratës shtetërore që të mund të jem i ndikuar apo i influencuar nga ndonjë faktor politik.

Më të vërtetë jam krenar për karrierën time të ndërtuar jashtë Shqipërisë. Jam krenar për çdo ditë të asaj karriere, jo për një vit apo për dy. Prandaj e quaj pak të çuditshme se si

është vendosur prej Avokatit të Popullit cilësimi që “nuk përmbush kushtet për të aplikuar për të gjitha funksionet”, ashtu siç në të vërtetë kam aplikuar. Kjo ka të bëjë me eksperiencën time, me llogaritjen e eksperiencës profesionale. Sigurisht, çështja është aritmetike dhe nuk mund të jetë opinion.

Unë jam paraqitur pas thirrjes së Avokatit të Popullit. Kam konstatuar se ata kishin vështirësi në llogaritjen e eksperiencës sime profesionale. E kam sqaruar me ta. Më kanë bindur dhe jemi bindur së bashku që eksperiencia ishte më tepër se 16 vjet. Prova e kësaj është shënimi në procesverbalin e rillogaritur që më kanë dorëzuar.

Pandeli Majko – Zoti Gentjan, më lejoni të bëj një ndërhyrje?

Gentjan Gurra – Po, sigurisht.

Pandeli Majko – Duke parë edhe CV-në tuaj... Më besoni që rillogaritja është thjesht një moment teknik, procedural, që nuk vë në dyshim asnjë nga aftësitë tuaja. Po ju them që CV-ja juaj hyn ndër më të mirat që kemi pare; ka edhe të tjerë, sigurisht. Shikojeni procesin, le ta quajmë kështu, jo vetëm në sensin moral të këndvështrimit, por edhe në sensin subjektiv. Ne jemi njerëz si gjithë të tjerët.

Një gjë është e sigurt: zgjidheni apo nuk zgjidheni, askush nuk i vë në dyshim vlerat tuaja profesionale.

Ju lutem!

Gentjan Gurra – Absolutisht! Shumë faleminderit për vlerësimin, i nderuar kryetar!

Gjithsesi, në njëfarë mënyre, mua më është mohuar një e drejtë, e drejta për t’u intervistuar, për t’u dëgjuar prej komisionit tjetër *ad hoc*, që mbajti mbledhjen e tij javën e kaluar.

I kam shkruar një *e-mail* administratës. Ishte e vetmja adresë që kisha për t’u drejtuar. Në momentin kur kam parë në faqen zyrtare të Kuvendit në internet, kam shkruar një *e-mail*, ku pyesja përse...

Pandeli Majko – Zoti Gentjan, ky nuk është një komision ankese.

Gentjan Gurra – Absolutisht!

Pandeli Majko – Më mirëkuptoni!

Gentjan Gurra – Gjithsesi, më kuptoni edhe mua. Kjo është e vetmja mundësi që kam për t’u dëgjuar.

Pandeli Majko – E kuptova, prandaj ndërhyra.

A ka pyetje nga kolegët?

Atëherë, ju uroj mbarësi!

Gentjan Gurra – Faleminderit!

Pandeli Majko – Suksese! Gjithë të mirat!

Vazhdojmë me Gëzim Cenajn.

Zoti Gëzim, keni tri minuta kohë për të shpjeguar arsyen përse dëshironi të konkurroni për komisioner publik.

Jeni intervistuar nga një komision i mëparshëm. Secili nga kolegët ka CV-në tuaj përpara. Kjo është arsyeja pse koha është e limituar, nuk është në sensin negativ.

Fjala është për ju!

Gëzim Cenaj – Kam konkurruar si gjithë të tjerët. Është një profesion që e kam pasur gjithmonë me dëshirë. Kam dhënë shumë. Kjo është arsyeja.

Pandeli Majko – A ka pyetje nga kolegët?

Gëzim Cenaj – Urdhëro?

Pandeli Majko – Iu drejtova kolegëve të mi, nëse kanë pyetje.

Ka pyetje?

Mirë. Ju faleminderit për mënyrën shumë të shkurtër dhe të qartë që u paraqitët!

Ju uroj mbarësi!

Gëzim Cenaj – Faleminderit!

Pandeli Majko – Gjithë të mirat!

Vazhdojmë me Herald Saraçin.

Zoti Herald, keni tri minuta kohë për t'i shpjeguar komisionit përse dëshironi të kandidoni për komisioner publik.

Jeni intervistuar edhe nga një komision i mëparshëm, që ka vlerësuar aftësitë tuaja. Secili nga kolegët ka CV-në tuaj përpara. Kjo është arsyeja që ne kemi vendosur një minutazh të shkurtër prej tre minutash, për të na shpjeguar arsyet.

Fjala është për ju!

Mos e merrni treminutëshin si një presion negativ. Nëse kolegët do të jenë të interesuar, do të bëjnë edhe pyetje pasi të flisni.

Shtypeni pak sustën që të dëgjoheni! Gjithçka që do të thoni do të regjistrohet.

Herald Saraçi – Faleminderit!

Unë quhem Herald Saraçi, me profesion jam jurist. Kam mbaruar studimet e larta me mesatare 9,2 në Universitetin e Tiranës, në Fakultetin e Drejtësisë, dega Juridik, në vitin 1997. Kam vazhduar studimet pasuniversitare në Universitetin e Lejtonit në Holandë. Nga ky universitet kam titullin “Master LLM në kriminologji”. Teza e masterit në Holandë ka qenë “*Respondig computer related crimes*”. Pas studimeve pasuniversitare në Holandë jam kthyer në Shqipëri, ku kam nisur të punoj në institucionet qendrore të shtetit shqiptar, si: në Ministrinë

e Ekonomisë, në Ministrinë e Drejtësisë dhe në Ministrinë e Brendshme. Në vitin 2002 kam aplikuar për pozicionin e sekretarit të Konferencës Gjyqësore dhe jam pranuar. Në CV-në time jam sekretar i parë i Konferencës Gjyqësore. Gjithashtu kam eksperiencë në të gjitha nivelet e administratës publike, si specialist, shef sektori dhe drejtor drejtorie. Kam punuar si shef sektori në Sektorin e Programimit dhe Koordinimit në Drejtorinë e Përafrimit të Legjislacionit në Ministrinë e Drejtësisë. Në Ministrinë e Brendshme kam qenë drejtor i Inspektoratit në shërbimin e kontrollit të brendshëm. Krahas karrierës sime profesionale si jurist, njëkohësisht, po kryej edhe një doktoraturë në histori, për ta plotësuar më mirë profilin tim profesional dhe akademik. Pra, kam një bekgraund si jurist dhe si studiues në histori. Mendoj se të gjitha këto krijojnë një profil të plotësuar për një person, i cili mund të kryej detyra të kësaj lartësie dhe këtyre kërkesave, siç është ajo e komisionerit publik.

Pandeli Majko- Dua t'ju bëj një vërejtje për CV-në, sepse kam parë edhe CV të tjera, që disa gjërave i keni rënë shumë shkurt, ndërsa mund t'i binit pak më gjatë, sepse realisht vlenin më tepër sesa ajo që keni në CV. Ky është opinion im.

Ka pyetje nga kolegët?

Ju uroj mbarësi!

Herald Saraçi – Faleminderit!

Pandeli Majko – Gjithë të mirat!

Irena Nino.

Zonja Irena Nino, ju keni një kohë në dispozicion prej tri minutash për t'u shpjeguar të gjithë kolegëve arsyet pse doni të kandidoni për të gjitha pozicionet. Jeni intervistuar në një komision të mëparshëm. Secili nga kolegët ka CV-në tuaj para dhe kjo është arsyeja që kemi lënë një kohë prej tri minutash, prandaj mos e merrni këtë në sensin negativ të fjalës.

Fjala për ju!

Irena Nino- Kam aplikuar për këtë vend pune, sepse mendoj që kam aftësitë e duhura profesionale për ta kryer këtë detyrë. Kam punuar rreth 20 vjet në sistemin e organit të prokurorisë, nga të cilat 7 vjet në Prokurorinë e Rrethit Shkodër, 8 vjet në Prokurorinë e Përgjithshme dhe pothuajse 4 vjet në Prokurorinë e Rrethit Tiranë.

Së dyti, kam edhe përkushtimin e duhur për ta kryer këtë detyrë.

Pandeli Majko- Ju jeni nga Shkodra, apo jo?

Irena Nino- Po.

Dhurata Çupi (Tyli) – Faleminderit, zonja Irena!

Në kurrikulumin tuaj shumë të shkurtër, ndoshta më i shkurtër, CV-në tuaj e keni datuar deri në vitin 2004, po pas vitit 2004 nuk ushtroni asnjë profesion?

Irena Nino- Jo, në vitin 2004 jam larguar me kërkesën time, për arsye shëndetësore, më pas kam marrë licencën e avokatit, por nuk e kam ushtruar detyrën dhe nuk e kam gjetur veten në atë profesion, të them të drejtën.

Dhurata Çupi (Tyli) – Pra, që nga viti 2004 nuk e ushtroni profesionin tuaj.

Irena Nino- Jo.

Dhurata Çupi (Tyli) – Faleminderit!

Pandeli Majko- Për arsye shëndetësore?

Irena Nino- Po.

Pandeli Majko – Të urojmë gjithë të mirat!

Mbarësi!

Irena Nino – Faleminderit!

Mirupafshim!

Pandeli Majko –Juelda Lamçe.

Zonja Juelda, keni tri minuta kohë për t’i shpjeguar komisionit arsyen pse dëshironi të jeni komisionere publike. Ju jeni intervistuar edhe në një komision tjetër të mëparshëm, secili nga kolegët ka CV-në tuaj para dhe kjo është arsyeja që koha e dëgjimit është tri minuta. Sigurisht do të ketë edhe pyetje, në qoftë se do të kërkohen nga kolegët.

Fjala për ju!

Juelda Lamçe – Faleminderit!

Dua t’u referohem kriterëve të vlerësimit të kandidatëve, duke u bazuar në nenin 6 të ligjit nr. 84 të vitit 2016. Theksoj se aktualisht mbaj titullin profesor i asocuar, jam pedagoge në Universitetin European të Tiranës. Jam diplomuar si juriste në vitin 2005, me një formim tërësor jashtë vendit, në një nga universitetet më prestigjioze italiane me eksperiencë 800-vjeçare në drejtësi, eksperiencë e konsoliduar nga pikëpamja profesionale si asistent pedagoge në Itali dhe pedagoge në Shqipëri. Kam qenë 3 vjet si asistent pedagoge në Universitetin e Maçeratës dhe 7 vjet në Shqipëri. Mendoj se jam njohëse e mirë e institucioneve shqiptare, sepse kam punuar 7 vjet në fushën akademike në Shqipëri dhe kam pasur përgjegjësi, sepse kam qenë përgjegjëse departamenti në universitet dhe kemi pasur mundësi bashkëpunimi me institucione dhe me organizata të ndryshme. Kështu që, në këtë kuptim, eksperiencia është e konsoliduar dhe mbi të gjitha fusha akademike të bën që të kesh një eksperiencë dhe analizë kritike të krahasuar sipas standardeve më të mira të Gjykatës Europiane të të Drejtave të Njeriut, sidomos në kuadër të respektimit të parimit të procesit të rregullt ligjor. Sigurisht që motivimi është i lartë, sepse në bazë të kriterëve që kërkohen, siç është integriteti i lartë,

paanshmëria politike, përgjegjësia dhe përkushtimi, të gjitha këto mendoj se janë ato që ju kërkoni.

Është e rëndësishme të theksoj se reforma në drejtësi, si një moment kyç, i cili kërkon të kthejë besueshmërinë e publikut në sistemin e drejtësisë, kërkon pikërisht një angazhim të këtij niveli.

Dua të theksoj se në kuadër të formimit tim si juriste, kam pasur vlerësim maksimal në doktoraturën që kam zhvilluar jashtë vendit dhe kam pasur vlerësime mjaft pozitive nga kolegët superiorë, studentët dhe nga të gjithë ata, me të cilët kam bashkëpunuar.

Gjithashtu, kam pasur bashkëpunim edhe me *Regione Marche*, ku kam qenë edhe pjesë e stafit që është marrë me bashkëpunimin rajonal, ku janë vlerësuar pikërisht projektet në nivel rajonal. Në këtë kuptim mendoj se figura është e kompletuar dhe eksperiencia akademike dhe profesionale mund të shërbejë për pozicionin për të cilin kam aplikuar!

Faleminderit!

Pandeli Majko- A ka pyetje nga kolegët?

Profesoreshë, ju uroj më të mirën!

Juelda Lamçe- Faleminderit juve!

Pandeli Majko – Julinda Mancaku.

(Ndërhyrje pa mikrofon.)

Zonja Julinda, keni tri minuta kohë për t'i shpjeguar komisionit arsyet pse dëshironi të kandidoni për komisionere publike. Ju jeni intervistuar nga një komision i mëparshëm, secili nga kolegët ka CV-në tuaj para dhe kjo është arsyeja pse koha është e limituar në tri minuta, nuk ka asnjë aspekt negativ.

Fjala për ju!

Julinda Mancaku – Duke menduar që një shoqëri e lirë nuk mund të jetë një shoqëri spektatore dhe liria në sensin e saj më të thellë kërkon pjesëmarrje, duke menduar që mund të kontribuojmë me aspektet tona profesionale se çfarë kemi arritur deti tani dhe aspektet sociale, është një mendim i mirë që të vijmë e të demonstrojmë veten dhe të shprehim veten, duke marrë pjesë në procesin e reformës në drejtësi.

Pse mendoj se mund të jem pjesë e procesit?! Në të gjithë eksperiencën që kam akumuluar deri tani, e cila ka të bëjë në udhëheqjen e projekteve të rëndësishme në qeverinë shqiptare, projekte me rëndësi të veçantë, projekte specifike, duke punuar, gjithashtu, përkrah ekspertëve ndërkombëtarë, që kanë çuar në udhëheqjen e këtyre projekteve dhe duke qenë pjesë e stafit, që i ka çuar atë në një realizim të suksesshëm, mendoj që përmbaj komponentët e duhur për të qenë pjesë e një procesi, që është i orientuar drejt arritjes së rezultateve pozitive.

Unë mendoj se mund të jem pjesë e sistemit, që kërkon të reformojë sistemin e drejtësisë në tërësi, duke u dhënë rëndësi të veçantë disa komponentëve siç janë: vizioni për t'i shërbyer ligjit dhe shoqërisë në tërësi; vizioni për të pasur integritetin, që të mos lëshojnë nga ajo çfarë mendojnë se është e duhur për t'u bërë.

Gjithashtu, duke qenë në kontakt edhe me pjesën bazike të shoqërisë, duke qenë se kam pasur një eksperiencë të gjerë në aspektin social, mendoj se kjo bën që të kem një eksperiencë të akumuluar në tërësi.

Pandeli Majko- A ka pyetje nga kolegët? Mirë, ju urojmë mbarësi!

Julinda Mancaku – Faleminderit!

Punë të mbarë!

Pandeli Majko- Gjithë të mirat!

Klara Mullaj

Klara Mullaj – Përshëndetje!

Pandeli Majko- Përshëndetje!

Zonja Klara, keni tre minuta kohë për të na shpjeguar shkurtimisht arsyen pse dëshironi të kandidoni për të gjitha pozicionet, jo vetëm për atë të komisionerit publik. Sigurisht, ju jeni intervistuar dhe nga një komision i mëparshëm, secili nga kolegët ka CV-në tuaj para, kjo është edhe arsyeja që afati i kohës është i shkurtër tri minuta.

Fjala për ju!

Klara Mullaj – Përshëndetje!

Aktualisht kam mbi 16 vjet eksperiencë pune. Gjatë këtyre viteve e kam testuar veten shpeshherë përballë situatave dhe problemeve, ku më është dashur të marr vendime dhe të mbaj qëndrimin tim. Gjithmonë kam vënë të parin ligjin dhe bindjen time të brendshme, përpara presioneve apo shtysave që mund të kem pasur në aktivitetin tim. Kjo përvojë pune dhe bindja se gjatë këtyre viteve ia kam dalë të ruaj integritetin tim profesional, më nxitën të aplikoj, duke menduar dhe me besimin e plotë se jam gati të kontribuoj në zbatimin e këtij ligji, si pjesë e rëndësishme e reformës në drejtësi. Nuk e mohoj, absolutisht, se që në fillim më ka intriguar ideja, që në qoftë se do të zgjidhesha, ky do të ishte një ogur shumë i mirë për karrierën time profesionale dhe një hop cilësor.

Pandeli Majko- A ka pyetje nga kolegët? Mirë.

Klara Mullaj - Shumë faleminderit!

Pandeli Majko- Të uroj mbarësi! Gjithë të mirat!

Lindita Blinishti

Lindita Blinishti –Përshëndetje!

Pandeli Majko- Zonja Lindita, keni tri minuta kohë për të na shpjeguar arsyet e kandidimit tuaj për të gjitha pozicionet, jo vetëm të komisioneres publike. Jeni intervistuar nga një komision i mëparshëm, secili nga kolegët ka CV-në tuaj para. Kjo është edhe arsyeja që koha është lënë tri minuta, jo si aspekt negativ i kësaj interviste me komisionin.

Fjala për ju!

Lindita Blinishti -Në radhë të parë, jam këtu për të mbështetur procesin dhe mendoj se pjesën e parë të misionit e kam kryer, pasi pa kandidatë s`do të kishte proces.

Në radhë të dytë, unë ushtroj prej shumë vitesh një profesion të nderuar, në mënyrë të paanshme, të pavarur, me etikë dhe me profesionalizëm, prandaj mendoj se këto cilësi i duhen edhe këtij procesi.

Pandeli Majko- Ndonjë gjë të veçantë tjetër? Nga kolegët ka ndonjë pyetje?

Lindita Blinishti -Shpresoj të jap më të mirën.

Pandeli Majko- Ishit mjaft e qartë, gjithsesi.

Ju urojmë mbarësi!

Lindita Blinishti -Gjithë të mirat!

Pandeli Majko- Gjithë të mirat!

Liri Llukani.

Zonja Liri, urdhëroni ju lutem! Keni tri minuta kohë për t'i shpjeguar komisionit lidhur me arsyen pse doni të kandidoni për komisionere publike. Ju jeni intervistuar nga një komision i mëparshëm dhe çdo koleg ka CV-në tuaj përpara. Kjo është arsyeja që koha është tre minuta dhe nuk ka të bëjë me ndonjë aspekt negativ të kësaj interviste.

Ju lutem, fjala për ju!

Liri Llukani -Kërkesa ime për t'u përfshirë dhe për të marrë pjesë në këtë format të këtij ligji, vjen si rrjedhojë e dëshirës sime për të mbushur prioritetet e mia profesionale, të cilat kanë të bëjnë me bindjen time, e cila ka përshkruar gjithnjë përvojën time profesionale. Gjithashtu, duke parë formatin e këtij ligji, i cili ka për qëllim rivlerësimin e prokurorëve dhe gjyqtarëve në Republikën e Shqipërisë, mendoj se serioziteti, përgjegjshmëria dhe saktësia që më karakterizojnë, do të jenë të dobishme.

Pandeli Majko – A kanë pyetje kolegët? Nuk kanë.

Ju uroj mbarësi!

Liri Llukani – Faleminderit! Punë të mbarë!

Pandeli Majko – Gjithë të mirat!

Luan Daci.

Urdhëroni!

Zoti Daci, keni tri minuta kohë për t’u shpjeguar kolegëve të komisionit arsyet pse doni të konkurroni për të gjitha pozicionet. Jeni intervistuar nga një komision i mëparshëm. Çdo koleg e ka CV-në tuaj përpara. Kjo është arsyeja që është lënë një kohë pre tri minutash dhe nuk ka të bëjë me ndonjë aspekt negativ të intervistës, pra për t’ju lënë juve si kandidatë mundësinë të na shpjegoni disa arsye thelbësore që komisioni i ka të nevojshme t’i dëgjojë.

Fjala është për ju.

Luan Daci – Faleminderit, zoti kryetar!

Unë kam mbaruar gjimnazin në Tepelenë me mesatare 9,4. Kam mbaruar Fakultetin e Drejtësisë në Universitetin Shtetëror të Tiranës me mesatare 8,4. Kam mbaruar masterin shkencor në Departamentin Publik me mesatare 8,7 në Universitetin Shtetëror. Kam 17 vjet punë si avokat dhe kam 4 vjet e gjysmë në sistemin gjyqësor, duke filluar nga ndihmësgjyqtar, gjyqtar dhe nënkryetar gjykate. Duke parë të gjithë angazhimin e politikës shqiptare, të shtetit shqiptar, të opinionit dhe të medias për reformimin e drejtësisë, mendoj se i plotësoj kriteret dhe kam dëshirë të kontribuoj në pjesëmarrjen në këto struktura që do të krijohen në bazë të ligjit nr. 86/2017. Në këto kushte, kam aplikuar në të tri sektorët. Jam familjar; kam dy fëmijë; banoj në Tiranë. Si pasuri kam një dhomë e një kuzhinë. Mendoj se i plotësoj kriteret për t’u emëruar nga ana e parlamentit shqiptar dhe e quaj veten të nderuar të punësohem në këtë sistem.

Pandeli Majko – Ju falënderoj edhe për hollësitë që dhatë për familjen tuaj!

A ka ndonjë pyetje? Nuk ka.

Zoti Luan, ju uroj mbarësi!

Luan Daci – Faleminderit, kryetar!

Pandeli Majko – Gjithë të mirat!

Lulzim Hamitaj.

Urdhëroni! Zoti Lulzim, ju keni tri minuta kohë për t’u shpjeguar kolegëve anëtarë të komisionit pse dëshironi të kandidoni për të gjitha pozicionet e shpallura nga Kuvendi i Shqipërisë. Jeni intervistuar edhe nga një komision i mëparshëm, në mos gabo. Secili nga kolegët e ka CV-në tuaj përpara. Kjo është arsyeja që është lënë një kohë prej tri minutash dhe nuk ka të bëjë me ndonjë aspekt negativ të marrjes në intervistë.

Fjala është për ju.

Lulzim Hamitaj – Faleminderit!

Dua të bëj thjesht një prezantim të eksperiencës dhe të përvojës sime mbi 25-vjeçare, si banim dhe studim, që e kam nisur në Romë. Pastaj në 1999-ën kam mbaruar studimet e larta në La Sapienza, pra prej 17-18 vjetësh ushtroj këtë profesion. Besoj se në këtë pikë që ka arritur më në fund reforma e drejtësisë, kam përshtypjen se i plotësoj ato kritere mbi bazën e të cilave

kërkohet kontributi i gjithsecili, ose i atyre që do të munden për ta konkretizuar pikërisht këtë reformë. Siç e thashë, kam një përvojë profesionale 17-18-vjeçare në Romë, ku kam përfunduar të gjitha studimet. Gjithashtu, kam kryer dy mastera, një shkencor dhe një profesional, përveç diplomimit. Në një farë mënyrë, formimin tim personal dhe profesional e konsideroj të një niveli europian dhe mendoj se komisioni është në kërkim të personave të tillë. Si rrjedhojë, nuk mund ta gjykoj ose mbivlerësoj vetveten. Jam në dispozicion të komisionit dhe të parlamentit për të bërë vlerësimet për sa i përket përshtatshmërisë sime.

Pandeli Majko – A ka pyetje nga kolegët? Nuk ka.

Jam i bindur për një gjë: Roma ka qenë provim më i vështirë se diskutimi për ju në këtë komision.

Lulzim Hamitaj – Sigurisht që prezenca ime këtu është një kënaqësi dhe nuk e konsideroj si një provim apo si një vështirësi. Ajo që unë do të uroj jo për personin tim, por më shumë për ecurinë e reformës dhe për rezultatet e mëtejshme të saj, për popullin dhe Shqipërinë që kriteret e parashikuara nga ligji dhe nga Kushtetuta të zbatohen me ndërgjegje nga ata që do të përzgjidhen dhe ajo çuarja e gishtit ndoshta do të bënte diferencën për të ardhmen e Shqipërisë. Përfshirja ose jo personale do të ishte një gjë relative dhe nuk mund ta mohoj që dëshira dhe kënaqësia do të ishin, por unë nuk jam këtu për të kërkuar një vend pune ose për të përmirësuar vendin e punës. Jam thjesht për të vënë në dispozicion të komisionit të parlamentit dhe të vendit tim përvojën time dhe mundësinë për të dhënë kontributin. Nëse kjo nuk do të realizohej, por do të realizohej reforma në drejtësi dhe do të jepeshin ato fryte që dëshirohen, sepse pritshmëria është e lartë jo vetëm në vend, por edhe jashtë, do të ishte gjithsesi një rezultat.

Pandeli Majko – Ju faleminderit! Gjithë të mirat!

Mimoza Tasi.

Mimoza Tasi – Mirëdita!

Pandeli Majko – Mirëdita, zonja Mimoza!

Keni tri minuta kohë për të na shpjeguar arsyet pse dëshironi të kandidoni për të gjitha pozicionet e ofruara nga Kuvendi i Shqipërisë. Ju jeni intervistuar edhe nga një komision i mëparshëm. Çdo koleg e ka CV-në tuaj përpara.

Fjala është për ju.

Mimoza Tasi – Faleminderit!

Atëherë, duke qenë se u krye një reformë shumë e rëndësishme kushtetuese dhe ligjore lidhur me reformimin e sistemit të drejtësisë, meqenëse plotësoja kushtet për institucionet e rivlerësimit për gjyqtarët dhe prokurorët në Republikën e Shqipërisë, ndjeva që mund të

aplikoja për të qenë pjesë e këtyre institucioneve. Kam punuar për vite të tera në Komisionin e Ligjeve, i cili më ka dhënë mundësinë të njihem me një pjesë të sistemit të drejtësisë lidhur me organet kushtetuese që raportojnë në Kuvend, të kem informacion të zgjeruar për proceset legislative që kanë ndodhur për reformimet e kodeve civile, penale, procedurale e me radhë, si dhe të njihem me aspekte të tjera të funksionimit të sistemit të drejtësisë. Në këto kushte, vlerësova si angazhim personal që të mund të aplikoja në institucionet e rivlerësimit. Gjithashtu, vlerësoj se ndoshta pas një kohe shumë të gjatë pune në Kuvend, ka ardhur momenti ta zhvilloj karrierën time profesionale edhe në një fushë tjetër të qeverisjes së vendit. Nëse do të vlerësohem nga ju, do të ishte nder për mua të jem pjesë e këtyre institucioneve.

Pandeli Majko – A kanë pyetje kolegët?

Mozën e njohim të gjithë.

(Ndërhyrje pa mikrofon.)

Mimoza Tasi – Aktualisht jam te Shërbimi i Seancës Plenare.

(Ndërhyrje pa mikrofon.)

Prej dy vjetësh. Nuk kam konflikt interesi. Këtë përgjigje e kam dhënë edhe në intervistën e parë që kam bërë. Ndoshta mund të jetë konflikt interesi nga ana juaj.

Pandeli Majko – Moza, faleminderit!

Mimoza Tasi – Faleminderit edhe ju!

Pandeli Majko – Mirion Theodhosi.

Zoti Mirion, keni tri minuta kohë për t'u shpjeguar kolegëve të komisionit arsyet pse dëshironi të kandidoni për komisioner Publik. Ju sigurisht që jeni intervistuar nga një komision i mëparshëm. Kolegët e ka CV-në tuaj përpara. Kjo është arsyeja që është lënë një kohë prej tri minutash dhe nuk ka të bëjë me ndonjë aspekt negativ të kësaj interviste.

Fjala është për ju.

Mirion Theodhosi – Mirëdita! Unë jam interesuar për të kontribuar për reformën në drejtësi në Shqipëri, duke pasur parasysh që kam diplomë perëndimore dhe kam ndjekur kurse pasuniversitare perëndimore. Mendoj se mund të sjell eksperiencën perëndimore për reformën në drejtësi në Shqipëri, duke pasur parasysh që ligji i jep rëndësi dhe prioritet eksperiencës dhe përvojës perëndimore. Ndërkohë, kam përfunduar edhe kursin për ndërmjetësimin, për të cilin kam aplikuar për licencë. Kam punuar 10 vjet në sistemin bankar me titullin jurist i lartë dhe kam mbaruar masterin “*European Business Law*” te Fakulteti i Drejtësisë në Tiranë. Për këtë arsye mendoj se mund të kontribuoj për reformën në drejtësi në Shqipëri.

Pandeli Majko – A kanë pyetje kolegët?

Mungesa e pyetjeve nuk do të thotë asgjë.

Ju uroj mbarësi! Gjithë të mirat!

Mirion Theodhosi – Faleminderit! Mirupafshim!

Pandeli Majko – Natasha Mulaj.

Zonja Tasha, keni tri minuta kohë për t’u shpjeguar kolegëve të komisionit arsyet pse dëshironi të kandidoni për të gjitha pozicionet që janë shpallur nga Kuvendi i Shqipërisë. Ju jeni intervistuar edhe nga një komision tjetër që i ka vlerësuar CV-në dhe aftësitë tuaja. Kolegët e ka CV-në tuaj përpara. Kjo është arsyeja që është lënë një kohë prej tri minutash dhe nuk ka të bëjë me ndonjë aspekt negativ të kësaj interviste.

Fjala është për ju.

Natasha Mulaj – Unë jam Natasha Mulaj. Kam mbaruar Fakultetin e Drejtësisë në Tiranë. Kam fituar konkursin që është shpallur për herë të parë në Republikën e Shqipërisë. Kam pasur fatin e madh që kam punuar te renditja e provave shkresore pranë Prokurorisë së Rrethit Gjyqësor të Tropojës. Kam kaluar në sistemin gjyqësor si ndihmësgjyqtare, pastaj kam kaluar gjyqtare. Me pas kalova në Gjykatën e Lartë si ndihmëse ligjore dhe këshilltare ligjore në çështjet civile, administrative dhe penale, por kryesisht në çështjet penale.

Me mbarimin e mandatit në Gjykatën e Lartë, po bëhen 4 vjet që jam e papunë. Ishte shans i madh që u bë ligji i vetingut dhe e ndiej veten, përballë këtij ligji, se i plotësoj të gjitha standardet morale, në radhë të pare, dhe profesionale të këtij ligji. Duke u nisur edhe nga qëllimi që ka ky ligj, pra të rikthejë besimin e institucioneve të drejtësisë në publik, si dhe duke garantuar funksionimin e shtetit të së drejtës dhe pavarësinë e institucioneve të drejtësisë, unë u gjenda përballë këtyre kriterëve dhe e gatshme që të konkurroj dhe të vij deri këtu. Edhe që kam ardhur deri këtu, jam shumë e vlerësuar, por shpresoj edhe më shumë.

Pandeli Majko – A kanë pyetje kolegët?

Nuk ka.

Ju falënderoj për mënyrën koncize të të folurit!

Natasha Mulaj – Faleminderit! Ditën e mirë!

Pandeli Majko – Nertila Mete.

Urdhëroni, zonja Nertila!

Zonja Mete, keni 3 minuta kohë për t’u shpjeguar kolegëve të komisionit arsyen pse dëshironi të kandidoni për komisioner publik. Ju jeni intervistuar nga një komision paraprak, që ka vlerësuar aftësitë dhe CV-në tuaj. Secili nga kolegët ka CV-në tuaj përpara. Kjo është edhe arsyeja që koha e prezantimit tuaj do të jetë 3 minuta. Mos e shikoni si aspekt negativ, sepse do të ketë kolegë që mund t’ju bëjnë pyetje dhe në fund do të konkludohet sipas procedurës përkatëse.

Ju lutem, fjala për ju!

Nertila Mete – Të them të drejtën, arsyeja pse kam kandiduar për këtë vend pune, është për një punë më të mirë.

Pandeli Majko – Si për një punë më të mirë?

Nertila Mete – Me eksperiencën time prej 15 vjetësh në profesionin juriste, e vlerësoj si një punë shumë të mirë.

Pandeli Majko – Merreni pozitivisht mendimin tim, sepse m'u duk shumë e thatë si përgjigje.

Nertila Mete – Mendoj se duke plotësuar kriteret, pasi kam studiuar jashtë vendit, kam bërë edhe studime pasuniversitare këtu në Shqipëri, jam e gatshme për ta kryer një punë të tillë.

Gjatë të gjitha viteve të punës sime kam punuar me ndershmëri, nuk kam pasur asnjëherë probleme gjatë punës dhe nuk jam pjesë e asnjë forumi politik apo biznesi, që mund të kem ndikime ose që të jem e varur gjatë kryerjes së kësaj pune, sepse kjo është arsyeja se çfarë kërkon kjo punë.

Pandeli Majko – Ju nuk votoni?

Nertila Mete – Jo, unë votoj, por nuk jam pjesë aktive e angazhuar nëpër forume apo çfarëdolloj gjëje.

Pandeli Majko - Ju kuptova.

Ka pyetje nga kolegët?

CV-në e kemi përpara dhe shikoj se është një CV shumë e pasur. Ju uroj mbarësi! Mos e merrni pjesën e trajtimit në mënyrë të shkurtër...

Nertila Mete – Jo.

Pandeli Majko – Ju urojmë gjithë të mirat!

Nertila Mete – Faleminderit!

Pandeli Majko – Olsi Komici.

Olsi Komici - Përshëndetje!

Pandeli Majko – Përshëndetje!

Zoti Komici, keni 3 minuta kohë për të na shpjeguar pse dëshironi të kandidoni për të gjitha pozicionet që janë shpallur nga Kuvendi i Shqipërisë. Ju keni kaluar në një komision që ka vlerësuar CV-në dhe aftësitë tuaja. Kolegët e mi e kanë CV-në tuaj përpara. Kjo është dhe arsyeja që koha është 3 minuta për të na dhënë disa detaje, të cilat mendoni se janë me interes për kolegët e mi.

Fjala është për ju.

Olsi Komici – Mendoj se jam i vlefshëm për një nga pozicionet e organeve të komisionit të vetëkontrollit, për shkak të eksperiencës sime të konsiderueshme disavjeçare në disa institucione të administratës shtetërore, kryesisht në struktura audituese-kontrolluese, ku shkurtimisht ju bëj me dije se kam punuar në sistemin e regjistrimit të pasurive të paluajtshme për një periudhë rreth 7- vjeçare, më pas për një periudhë 3-vjeçare kam qenë jurist në Sektorin e Kontrollit Tekniko-Ligjor, gjithashtu dhe në ish-Komitetin Shtetëror të Kthimit dhe Kompensimit të Pronave prej një periudhë 1-vjeçare, ku dhe aty kam qenë pjesë e Sektorit të Kontrollit Tekniko-Ligjor, gjithashtu dhe kryetar i komanduar i ish-Komisionit Vendor të Kthimit dhe Kompensimit të Pronave për qarkun e Tiranës. Gjithashtu, kam punuar në Agjencinë e Trajtimit të Kredive në periudhën janar 2007-korrik 2013 në pozicione të ndryshme pune nga specialist jurist deri në zëvendësudrejtor i Përgjithshëm i institucionit për një periudhë pothuajse 3-vjeçare, përgjegjës për të gjithë veprimtarinë ligjore të atij institucioni. Gjithashtu, kam qenë ekspert i jashtëm ligjor për periudhën 2014-2015 në grupin task-forcë të ngritur nga Kryeministri për verifikimin e tjetërsimit të pasurisë së paluajtshme shtetërore tek të tretët në zonën Vlorë-Sarandë. Kam qenë jurist dhe aktualisht punoj tek ALUIZNI.

Gjithashtu, kam qenë pjesë shumë aktive në analiza të thella ligjore në të gjitha institucionet, ku kam qenë dhe ekspert determinant për sa i përket hartimit të akteve të ndryshme administrative nënligjore dhe ligjore, ku kam punuar.

Pandeli Majko – Ka pyetje nga kolegët?

Dhurata Çupi (Tyli) – Faleminderit, zoti Olsi!

Së pari, këtu në CV-i thoni se aktualisht jeni avokat, ndërkohë sapo deklaruat që punoni tek ALUIZNI.

Olsi Komici - Në momentin që kam depozituar CV-në dhe kam plotësuar kriteret formale, komform ligjit të vetëkontrollit, kam qenë në pozicionin e avokatit.

Dhurata Çupi (Tyli) – Nga CV-ja duket sikur e keni mbyllur karrierën si ekspert në Kryeministri. Cila është forma e rekrutimit në Kryeministri?

Faleminderit!

Olsi Komici – Në Kryeministri jam rekrutuar nëpërmjet CV-së sime dhe nëpërmjet një interviste të thellë profesionale.

Pandeli Majko – Ka pyetje nga kolegë të tjerë? Nuk ka pyetje.

Faleminderit!

Olsi Komici – Faleminderit!

Pandeli Majko – Zonja Oriela Shishi, keni 3 minuta kohë për të na shpjeguar pse dëshironi të kandidoni për të Komisioner Publik. Ju jeni intervistuar nga një komision i mëparshëm, kështu që ka një vlerësim paraprak. Kolegët e mi kanë CV-në tuaj përpara. Kjo është edhe arsyeja që koha është lënë 3 minuta për të na dhënë disa detaje më shumë se ajo që shkruhet në CV-i. Ju lutem, mos e merrni në sensin negativ kohën e shkurtër.

Fjala është për ju.

Oriela Shishi – Dua të filloj me motivin se cilat janë arsyet që aplikoj te ky pozicion. Janë dy motive.

Së pari, është një dëshirë e imja e hershme, që kur kam mbaruar fakultetin, për të qenë pjesë e gjyqësorit, sidomos te pjesa e akuzës dhe emërimin tim te ky pozicion do ta konsideroja një privilegj.

Së dyti, gjithmonë kam synuar për të qenë pjesë e një institucioni të pavarur dhe kur them “të pavarur”, kam parasysh pavarësitë politike.

Këto janë dy motivet kryesore për të cilat aplikoj.

Pandeli Majko – Në rregull!

(Ndërhyrje pa mikrofon.)

Oriela Shishi - Te Drejtoria e Përgjithshme e Meteorologjisë, është një institucion qendror në varësi të Ministrisë së Ekonomisë. Punoj aty prej vitit 2006, pa shkëputje, tek i njëjti pozicion.

Pandeli Majko – Keni mbaruar në një universitet, si ai i Bukureshtit, që njihet për standardet e larta të drejtësisë.

Oriela Shishi - Po dhe kam ardhur pastaj në Shqipëri.

Faleminderit!

Pandeli Majko – Ka pyetje të tjera nga kolegët? Në rregull.

Faleminderit! Ju uroj mbarësi!

Oriela Shishi - Faleminderit dhe gjithë të mirat!

Pal Shkambi – Mirëdita!

Pandeli Majko – Mirëdita. Zoti Pal, keni 3 minuta kohë për të na shpjeguar pse dëshironi të kandidoni për të gjitha pozicionet që janë shpallur nga Kuvendi i Shqipërisë. Ju keni kaluar në një komision të mëparshëm, që ka vlerësuar CV-në dhe aftësitë profesionale tuaja. Secili nga kolegët ka CV-në tuaj përpara. Kështu që koha prej 3 minutash nuk duhet parë si moment negativ. Ju lutem, shpjegimet tuaja, çfarë dëshironi të na thoni?

Fjala është për ju.

Pal Shkambi – Faleminderit, zoti kryetar!

Faleminderit të gjithëve!

Unë jam Pal Shkambi, nga Shkodra, lindur më 24.08.1963, i martuar, me tre fëmijë. Jam motivuar për të marrë pjesë dhe për të kontribuar në reformën në drejtësi, sepse vendi ka shumë nevojë për këtë kontribut, duke njohur vullnetin e mirë dhe potencialet e mia intelektuale dhe shpirtërore.

Jam i diplomuar si jurist që nga viti 2002, por edhe ekonomist, financier kontabilist, psikolog klinik, kam edhe master shkencor, të cilin nuk e kam mbaruar, pasi më mungon një provim. Të gjitha të tjerat i kam kryer.

Kam një eksperiencë të gjatë pune, por jam specilaizuar edhe në fushën kriminale. Më parë kam punuar edhe në organet e policisë, si oficer i rendit dhe i Policisë Kriminale në komisaritet e Shkodrës, Elbasanit dhe Lezhës. Në këto rrethana, e ndiej veten një person me integritet, një person i paanshëm, me vullnet të mirë dhe, sigurisht, kam një reputacion të mirë ose një besueshmëri të madhe në publik, meqenëse jam përpjekur të jap një kontribut sadopak edhe në politikë, jam përpjekur për të gjitha shtresat e shoqërisë, për një barazi gjinore, për një konkurrencë të ndershme. Domethënë, që të dalin dhe të vijnë njerëzit e ndershëm në pushtet dhe të japin kontribute për një shtet si një familje e qytetëruar. Pra, të gjithë së bashku të bëjmë më të mirën e mundshme, duke e ndierë veten si një familje, duke respektuar meritokracinë dhe vullnetin e mirë.

Faleminderit!

Pandeli Majko - Zoti Pal, këtë barazinë gjinore nuk e kuptova?

Pal Shkambi – Për barazinë gjinore e pata fjalën në të gjitha aspektet e demokracisë, një kolonë është edhe kjo: në radhë të parë, gjithëpërfshirja, ku të marrin pjesë të gjitha shtresat e shoqërisë edhe të presekutuarit, edhe të diskriminuarit e asaj kohe.

Së dytë, të jetë një konkurrencë e ndershme, ku të gjithë njerëzit të marrin pjesë në vendimmarrje dhe politikbërje, në bazë të aftësive dhe të vullnetit të ndershmërisë që kanë ata.

Së treti, t'i shikojmë të gjithë njerëzit si vëllezër dhe të bëjmë bashkimin e pajtimin kombëtar.

Së katërti, barazia gjinore ku të marrin pjesë njësoj si femrat, edhe meshkujt në të gjitha kontributet për një demokraci reale dhe të vërtetë.

Faleminderit, zoti kryetar!

Pandeli Majko – Faleminderit, vërtet qenke i veçantë!

Të uroj mbarësi dhe sukses!

Faleminderit!

Pal Shkambi – Faleminderit në të gjitha aspektet, juve dhe ne, bashkë!

Mirupafshim!

Pandeli Majko – Pamela Qirko.

Pamela Qirko – Mirëdita!

Pandeli Majko – Mirëdita!

Zonja Pamela, keni 3 minuta kohë për të na shpjeguar arsyet pse dëshironi të kandidoni për të gjitha pozicionet që janë shpallur nga Kuvendi i Shqipërisë. Ju keni kaluar në një komision të mëparshëm për të gjitha këto që po flasim. Kolegët e mi kanë CV-në tuaj përpara. Kjo është edhe arsyeja që koha është lënë 3 minuta, na shpjegoni diçka të veçantë, lidhur me CV-në apo me aftësitë tuaja për vendin që kërkonin të kandidoni.

Fjala është për ju.

Pamela Qirko – Jam Pamela Qirko, avokate. Që nga viti 2001 jam diplomuar në Fakultetin e Drejtësisë, prej asaj kohe ushtroj profesionin si juriste. Në vitin 2004 kam marrë licencën e avokatisë dhe prej asaj kohe jam avokate, ku përfaqësohem në të gjitha shkallët e gjyqësorit. Këtu dua të theksoj se jam avokate aktive, pavarësisht se në CV-i jam juriste e atashuar pranë një kompanie të telekomunikacionit ndërkombëtar. Aplikova këtu duke qenë se ...

Pandeli Majko – Pse nuk e thoni emrin e kompanisë, më duket me vend ta thoni, pra AMC-ja, në mos gabo, sot Telekom.

Pamela Qirko – Po sot Telekom, pjesë e “Deutsche Telekom Group”.

Pandeli Majko – Është një kompani që ju bën nder duke e thënë.

(Ndërhyrje pa mikrofon.)

Nuk është çështje publiciteti, është çështje serioziteti.

(Ndërhyrje pa mikrofon.)

Pamela Qirko – Duke qenë se e njoh mirë sistemin gjyqësor, problematikën prej shumë vitesh, e ndiqja me shumë interes reformën në drejtësi, megjithëse nuk kisha menduar kurrë se do të aplikoj për këto pozicione. Por duke qenë se në janar u bë një thirrje publike, dëshiroja dhe unë të jepja kontributin tim në lidhje me këtë reformë, që e vlerësoj si një ndër reformat më të rëndësishme për Shqipërinë.

Pse duhet të më zgjidhni mua dhe çfarë kam ndryshe nga të tjerët? Unë karakterizohem nga një... Jam mësuar të punoj nën stres.

Kam një shkollim...

Për shkak të detyrës kam pasur...

Pandeli Majko – T’ju bëj një korigjim? Thoni: nën presion, jo nën stres.

Pamela Qirko – Po, nën presion.

Pandeli Majko – Ashtu!

Pamela Qirko – Për shkak të punës që kam bërë, jam trajnuar për ligjet europiane, kam marrë shumë trajnime. Kam punuar për një farë kohe dhe prej një muaji në Gjykatën e Luksemburgut, duke marrë kështu eksperiencë. Kam parime të larta, i plotësoj të gjitha kriteret ligjore dhe jam shumë e motivuar për të dhënë kontributin tim për këtë reformë.

Pandeli Majko – Mirë.

(Ndërhyrje pa mikrofon.)

Po.

Dhurata Çupi (Tyli) – Faleminderit!

Ju thatë që profili juaj është juriste apo avokate e një kompanie private, si dhe keni qenë përfaqësuese ligjore në shkallë të ndryshme të sistemit të drejtësisë.

Pamela Qirko – Po, jam.

Dhurata Çupi (Tyli) – Nëse ju votoheni në këtë komision, trashëgoni mllef, trashëgoni realitet apo thjesht profesionalizëm ndaj sistemit të drejtësisë?

Faleminderit!

Pamela Qirko – Do të trashëgoj shumë profesionalizëm, duke qenë se e njoh thellë. Nuk trashëgoj mllef, sepse unë kam bërë detyrën, kam hasur problematika të ndryshme, por ka qenë thjesht punë për mua dhe asgjë personale. Pra, nuk kam mllef, por vetëm e di se ku çalon.

Faleminderit!

Pandeli Majko – Absolutisht, procesi gjyqësor në fund fare nuk është një çështje personale.

Mirë. Ka ndonjë merak tjetër? Nuk ka.

Ju faleminderit!

Pamela Qirko – Faleminderit juve!

Punë të mbarë!

Pandeli Majko – Vazhdojmë me kandidatin tjetër, zotin Petrit Agaj.

(Ndërhyrje pa mikrofon.)

Zoti Petrit, keni tri minuta kohë për t'i shpjeguar komisionit arsyet pse dëshironi të kandidoni për komisioner publik. Ju jeni dëgjuar paraprakisht nga një komision tjetër, që ka bërë vlerësimin e CV-së suaj dhe të aftësive profesionale. Koha tri minuta nuk ka të bëjë me ndonjë aspekt negativ, por lidhet me faktin që ky është komisioni i dytë ku ju dëgjoheni dhe secili nga kolegët e mi ka CV-në tuaj përpara.

Fjala është për ju.

Petrit Agaj – Faleminderit!

Nisur nga ligji i vetingut nr. 84 i vitit 2016 “Për rivlerësimin kalimtar të gjyqtarëve dhe prokurorëve në Republikën e Shqipërisë”, nisur nga kërkesat imediate të kohës që parashtrohet si domosdoshmëri e madhe për zbatimin e këtij lloj ligji, që hyri në fuqi nga parlamenti shqiptar, nisur nga mbështetja që më kanë dhënë dashamirësit, miqtë dhe familjarët, nisur nga përvoja e punës sime në administratë dhe si profesion i avokatit, pra të gjitha këto elemente më dhanë një shtysë dhe bazën që gjeta unë për të qenë një nga, po ta krahasojmë, si një tullë në murin e demokracisë.

Vetitë e mia janë të njohura, nuk ka nevojë të shprehem më tepër: kam punuar me ndershmëri gjithandej nëpër sektorë si privatë, ashtu edhe shtetërorë. Kam kryer kurse trajnimi brenda dhe jashtë shtetit. Jam certifikuar nga Këshilli i Europës për kursin e gjyqtarëve dhe prokurorëve dhe në të gjithë punën time në administratën publike jam udhëhequr nga parimi i transparencës, ndershmërisë, zbatimit të ligjit, kërkesave që përcakton ligji, Kodi i Procedurave Administrative, ku janë katërmbëdhjetë parimet kryesore që një nëpunës i administratës duhet t’i zbatojë me korrektësi, pasi pa ato nuk mund të ecet as në procesin e ardhshëm, që bëhet fjalë për vetingun, bazuar te Kodi i Procedurës Administrative, i riu, që ka ndryshime nga ai i mëparshmi. Pra elementi kryesor i punës sime ka qenë dhe do të jetë gjithmonë mbështetja në parimet që përcakton ky ligj, që është ligji procedural. Ndërsa ligji material dihet se është mëse i njohur.

Pandeli Majko – Ka pyetje nga kolegët?

(Ndërhyrje pa mikrofon.)

Nuk ka.

Mirë, zoti Petrit, ju uroj mbarësi!

Petrit Agaj – Faleminderit shumë!

Pandeli Majko – Gjithë të mirat!

Vazhdojmë me kandidatin tjetër, zotin Roland Gjoni.

Zoti Roland.

Roland Gjoni – Përshëndetje!

Pandeli Majko – Keni tri minuta kohë për t’u shpjeguar kolegëve të komisionit arsyet pse dëshironi të jeni komisioner publik.

(Ndërhyrje pa mikrofon.)

Roland Ilia – Jo, nuk jam për komisioner publik. Jam te Komisioni i Kualifikimit.

(Ndërhyrje pa mikrofon.)

Pandeli Majko – Më falni!

Nuk është paraqitur zoti Gjoni?

(Ndërhyrje pa mikrofon.)

Në rregull.

(Ndërhyrje pa mikrofon.)

Atëherë, kjo duhet shpjeguar. Jemi përballë zotit Roland Ilia. Zoti Roland Gjoni nuk është paraqitur.

Zoti Ilia, keni tri minuta kohë për t'i shpjeguar komisionit arsyet pse dëshironi të kandidoni për pozicionin komisioner i pavarur i kualifikimit.

Jeni marrë në intervistë nga një komision paraprak.

Roland Ilia – Nga dy të tillë.

Pandeli Majko – Dy? Kjo është arsyeja pse intervista me ne do të jetë e shkurtër, gati tri minuta, për të na shpjeguar me pak fjalë disa momente të veçanta të karrierës suaj, që mendoni dhe vlerësoni se janë të vlefshme për t'u dëgjuar nga anëtarët e komisionit. Kjo është edhe arsyeja pse koha prej tri minutash që është deri diku e shkurtër, nuk ka asnjë aspekt negativ.

Roland Ilia – E qartë.

Pandeli Majko – Fjala është për ju.

Roland Ilia – Unë quhem Roland Ilia.

Që nga viti 1996 jam pedagog në Fakultetin e Drejtësisë në Universitetin e Shkodrës, ku jap lëndën “E drejta civile”, por kam studiuar edhe në universitetet e Gjermanisë, si në Këln, ku kam marrë masterin në vitin 2002 dhe doktoraturën, disertacionin në Universitetin e Giessen-it.

Vazhdoj prapë atje, ku jap edhe mësim. Arsyeja pse kam vendosur të kandidoj është se pashë të arsyeshme një reformë serioze dhe thashë që me gjithë atë eksperiencë që kam, të jap një kontribut sado të vogël. Kështu mendoj.

Pandeli Majko – Ka pyetje nga kolegët?

Nuk ka.

(Ndërhyrje pa mikrofon.)

Ulsiu nuk mund të të bëjë pyetje, sepse e ke pasur shok klase.

Roland Ilia – Po, është e vërtetë.

Pandeli Majko – Ju faleminderit dhe ju uroj mbarësi!

Roland Ilia – Gjithë të mirat! Punë të mbarë!

(Ndërhyrje pa mikrofon.)

Pandeli Majko – Shumë djalë i mirë, dukej!

Vazhdojmë me kandidaten tjetër, zonjën Rovena Pregja.

Rovena Pregja – Mirëdita!

Pandeli Majko – Zonja Rovena, keni tri minuta kohë për t’i shpjeguar komisionit përdëshironi të kandidoni për komisionere publike. Ju jeni intervistuar nga një komision i mëparshëm. Duke qenë se kolegët e kanë CV-në tuaj përpara, kjo është edhe arsyeja pse koha e vënë në dispozicion është vetëm tri minuta.

Në vlerësimin tuaj, çfarë mendoni se duhet të dëgjojmë ne si komision për kandidimin tuaj?

Rovena Pregja – Në fakt, aplikimin e kam bërë për të gjitha komisionet, pavarësisht se jam kualifikuar vetëm për komisionere publike.

Gjatë viteve të mia të punës e kam ushtruar profesionin në disa aspekte, ku do të doja të theksoja avokatinë; jam marrë me kërkim ligjor, sepse kam pasur fatin të merrem me disa projekte dhe specifikisht me fushën e drejtësisë, çka më ka dhënë mundësinë ta shikoj sistemin nga afër dhe të jap edhe rekomandimet e mia sipas rastit. Gjithashtu kam punuar në një mjedis ndërkombëtar për një periudhë dy vjet e gjysmë, duke dhënë kontributin në rekomandimet që ndërkombëtarët kanë dhënë për bërjen sa më të mirë të sistemit. Sigurisht, në vitet e mia të para kam qenë juriste e thjeshtë.

Aktualisht punoj prej tre vjetësh në administratën e Kryeministrit në nivelin përgjegjës sektori. Mendoj se e gjithë përmbledhja, është shumë e shkurtër, e punës më bën një figurë të kompletuar për të dhënë edhe atë që, mbi të gjitha, kërkon edhe ligji apo vetë reforma që po bëhet.

Pandeli Majko – A ka pyetje nga kolegët?

Dhurata Çupi (Tyli) – Faleminderit, zonja Rovena!

Ju vazhdoni të punoni aktualisht në Kryeministri dhe që nga viti 2014, siç edhe deklaruat vetë, jeni pjesë e administratës shtetërore.

Rovena Pregja – Po, nga marsi i vitit 2014.

Dhurata Çupi (Tyli) – Cila ka qenë forma e rekrutimit?

Rovena Pregja – Rekrutimi është bërë nga Departamenti i Administratës Publike, duke filluar me shpalljen e vendit të lirë, kam aplikuar, kam konkurruar dhe kam filluar punë atje pas njoftimit nga DAP-i në atë kohë.

Dhurata Çupi (Tyli) – Faleminderit!

Rovena Pregja – Faleminderit!

Pandeli Majko – A ka pyetje të tjera? Nuk ka.

Mirë.

Zonja Rovena, e rëna shkurt nuk do të thotë asnjë aspekt negativ të intervistës së sotme.

Ju urojmë mbarësi!

Rovena Pregja – Faleminderit!

Pandeli Majko – Gjithashtu.

Vazhdojmë me kandidaten tjetër, zonjën Rozeta Ivanova.

Rozeta Ivanova – Përshëndetje!

Pandeli Majko – Përshëndetje!

Zonja Rozeta, keni tri minuta kohë për t'i shpjeguar komisionit arsyet pse dëshironi të kandidoni për Komisionin e Pavarur të Kualifikimit. Ju jeni intervistuar edhe më parë dhe duke qenë se kolegët e kanë CV-në tuaj përpara, kjo është një nga arsyet pse koha është e shkurtër, tri minuta. Nuk ka asnjë aspekt negativ. Në vlerësimin tuaj, çfarë dëshironi t'u thoni anëtarëve të komisionit?

Fjala për ju.

Rozeta Ivanova – Realisht ky është kandidimi i dytë, sepse unë kam kandiduar edhe për kreun e KQZ-së, madje para disa muajve kam qenë pikërisht në këtë sallë.

Ndonëse nuk jam demoralizuar aspak nga ai kandidim, edhe pse dihej për të metat që ka Kodi Zgjedhor dhe nga fakti se unë nuk kisha mbështetje politike, isha e vetëdijshme se si do të përfundonte ai kandidim. Megjithatë, këtë parantezë e bëra për të kujtuar se Kuvendi e di pak a shumë *background*-in tim dhe vlerësoj që kandidatura do të merret në konsideratë.

Sot jam këtu, sepse kandidoj për pozicionin e anëtares së Komisionit të Pavarur të Kualifikimit, një prej organeve të rivlerësimit, dhe do të isha e nderuar që të bëhesha pjesë e këtij procesi për faktin se, ashtu sikurse të gjithë, kemi kohë që duam një drejtësi më të mirë, një drejtësi më të kualifikuar dhe një drejtësi larg korrupsionit.

Personalisht kam vite që i shërbej gjyqësorit dhe asnjëherë nuk jam ndikuar prej tij, por kam ndenjur larg. Këtë e quaj një meritë të madhe, edhe pse që prej vitit 2003 jam juriste e Zyrës së Buxhetit Gjyqësor dhe kam punuar me tenderimet në gjyqësor.

Personalisht dua t'ju shpreh hapur dhe sinqerisht se unë e shoh ngritjen e këtyre organeve edhe si një moment historik, jo thjesht një procedurë ligjore, për faktin se, ashtu siç u shpreha, të gjithë duam një drejtësi më të mirë, një drejtësi reale dhe këtë e them me shpirt, sidomos për atë njeriun e thjeshtë, që nuk ka mbështetje, që shpeshherë e kam parë me sytë e mi se si rri pas dyerve të gjykatave dhe nuk gjen drejtësi. Kjo ishte pak a shumë e gjitha çfarë mund të shprehja me pak fjalë, sepse unë mund të zgjatesha edhe më shumë. Megjithatë, nuk dua t'ju marr as juve kohë. Shpresoj që komisioni të më ketë në konsideratë dhe të më votojë.

Faleminderit!

Pandeli Majko – Ka pyetje nga kolegët?

Nuk ka.

(Ndërhyrje pa mikrofon.)

Do të më lejosh të bëj unë një koment?

Rozeta Ivanova – Patjetër.

Pandeli Majko – E filluat me “Në Komisionin e Ligjeve nuk u zgjodha, sepse, edhe...”.

Rozeta Ivanova – Jo, bëra një rezymë dhe një parantezë pa ndonjë...

Pandeli Majko – Mos u shqetësoni, nuk e kam në sensin negativ.

Rozeta Ivanova – Jo, nuk e kisha për ndonjë gjë.

Pandeli Majko – Fakti se ju keni ardhur dy herë këtu, do të thotë se nga ana profesionale ju jeni ajo që jeni.

Rozeta Ivanova – Sigurisht.

Pandeli Majko – Kësaj nuk i hiqet asnjë presje.

Rozeta Ivanova – Faleminderit!

Pandeli Majko – Zgjidheni ose jo, ky është një moment subjektiv. Të gjithë jemi njerëz dhe gabojmë. Dakord?

Rozeta Ivanova – Sigurisht.

Unë atë e bëra thjesht për t’ju kujtuar se Kuvendi e njeh tashmë *background*-in tim, nuk e bëra për asnjë arsye tjetër.

Pandeli Majko – Në çdo rast besoj që mirëkuptoni.

Rozeta Ivanova – Publiku tashmë e di që Rozeta Ivanova është një person i pavarur dhe, absolutisht, as ka qenë dhe as është e ndikuar politikisht.

Pandeli Majko – Dakord.

Rozeta Ivanova – Kaq është e gjitha.

Pandeli Majko – Vetëm se, Rozeta, mos harro të votosh, gjithsesi!

Rozeta Ivanova – Si jo! Ai është obligim qytetar, nuk diskutohet.

Pandeli Majko – Ju uroj...

Rozeta Ivanova – Aq më shumë që një juriste nuk mund ta bëjë një gabim të atillë.

Pandeli Majko – Ju uroj gjithë të mirat!

Jeni e vetmja kandidate për të cilën e zgjata pak intervistën, sepse e pashë që ishit pak e mërzitur.

Gjithë të mirat!

Rozeta Ivanova – Gjithë të mirat edhe ju!

Shumë faleminderit dhe punë të mbarë!

Pandeli Majko – Vazhdojmë me kandidatin Serxhio Mazreku.

Urdhëroni, zoti Serxhio!

Serxhio Mazreku – Faleminderit!

Pandeli Majko – Keni tre minuta kohë në dispozicion për të shpjeguar përpara komisionit, gjithçka që ju do të thoni do të regjistrohet, pse dëshironi të kandidoni për komisioner publik. Arsyeja pse do të flisni vetëm tre minuta është se ju jeni intervistuar nga një komision i mëparshëm, i cili ka bërë vlerësimin e aftësive tuaja dhe se kolegët e mi e kanë përpara CV-në tuaj.

Fjala është për ju.

Serxhio Mazreku – Arsyeja pse kandidoj për komisioner publik është:

Së pari, unë jam avokat me eksperiencë pune rreth 14-vjeçare. Kam mbaruar Fakultetin e Drejtësisë në vitin 2002 dhe kam marrë licencën në muajin mars të vitit 2004. Kam mbaruar studimet master shkencor me rezultate të shkëlqyera, si dhe kam eksperiencë pune shumë të madhe në proceset civile dhe penale.

Pavarësisht se kam mbaruar studimet master shkencor në fushën civile dhe tregtare, aktualisht ushtroj profesionin e avokatit në fushën penale dhe kam pasur shumë sukses për sa u përket vendimeve.

Faktikisht, jam caktuar si komisioner publik.

Institucionet e vlerësimit janë: Gjykata e Apelit, që është vendimi i formës së prerë, Komisioni i Pavarur, që ka funksionin e një gjykate dhe Komisioni Publik që bën apelimet e vendimeve të Komisionit të Pavarur.

Të tria komisionet bëjnë rivlerësimin e prokurorëve dhe gjykatësve për sa i përket pasurisë nëpërmjet Inspektoratit të Lartë të Deklarimit të Pasurive dhe Konfliktit të Interesit, anës morale dhe asaj profesionale, që e ka Këshilli i Lartë i Drejtësisë.

Pra, të tria komisionet funksionojnë për të bërë rivlerësimin e prokurorëve dhe gjykatësve dhe, nëse janë të korruptuar, normal që do të largohen nga sistemi i drejtësisë. Unë e kam kënaqësi që jam kandidat për komisioner publik.

Pandeli Majko - Ka pyetje nga kolegët?

Të uroj me gjithë zemër mbarësi!

Serxhio Mazreku – Faleminderit!

Pandeli Majko - Vazhdojmë me kandidatin Shefqet Dida.

Uluni, zoti Shefqet.

Shefqet Dida – Faleminderit!

Pandeli Majko – Keni tre minuta kohë për të shpjeguar arsyet pse dëshironi të jeni komisioner publik. Jeni intervistuar paraprakisht nga një komision, i cili ka vlerësuar aftësitë

dhe CV-në tuaj. Arsyeja pse do të flisni vetëm tre minuta është se të gjithë kolegët e mi e kanë CV-në tuaj përpara. Kjo nuk ka asnjë efekt negativ, sepse ju e keni kaluar intervistën në një komision dhe CV-në tuaj ne e kemi përpara.

Fjala është për ju.

Shefqet Dida – Faleminderit, zoti kryetar!

Për të punuar në institucionin e rivlerësimit, mendoj se janë po ato kritere që duhen për të vlerësuar funksionarët e gjykatave dhe prokurorive, por pak më të rrepta. Unë mendoj se janë dy kritere: kriteri i pastërtisë dhe kriteri i aftësisë profesionale.

Së pari, pretendoj përpara komisionit se e plotësoj kriterin e pastërtisë nga ana kriminale, korrupsionit dhe integritetit moral.

Së dyti, pretendoj para komisionit se e plotësoj kriterin e aftësive profesionale, për arsye se kam punuar në regjime të ndryshme juridike dhe jam i aftë të zgjidh një situatë juridike brenda kuadrit ligjor në një kohë rekord.

Punën në institucionin e rivlerësimit e vlerësoj shumë të vështirë, delikate dhe jo si ...

Pandeli Majko – Zoti Shefqet, t’ju sjellim pak ujë?

Shefqet Dida – Jo, thjesht jam pak i emocionuar.

Pandeli Majko – Mos u shqetësoni, sepse këtu ambienti është miqësor.

Shefqet Dida – Faleminderit!

Punën në institucionin e rivlerësimit nuk e konsideroj privilegj, por shumë të vështirë dhe delikate për arsye se funksionarët që do të rivlerësohen...

Legjislacioni për reformën në drejtësi ka një bashkësi ligjesh që përmbledhen në shtatë paketa kryesore. Ato janë:

1. Paketa e ndryshimeve kushtetuese.
2. Paketa e ligjeve të reformës në gjyqësor.
3. Paketa e ligjeve në legjislacionin penal.
4. Paketa e ligjeve antikorruption.
5. Paketa e ligjeve për edukimin dhe arsimin.
6. Paketa e ligjeve për profesionet e lira (avokat, noter, përmbarues).
7. Paketa e ligjeve në fushën financiare.

Më kryesorja nga këto është paketa e ligjeve antikorruption.

Në paketën e ligjeve antikorruption bëjnë pjesë:

1. Ligji “Për Prokurorinë Kombëtare Antikorruption”, që është në procedurë.
2. Ligji “Për Gjykatën e Krimeve të Rënda Antikorruption”, që është në procedurë.

3. Ligji nr. **9367**, datë 07.04.2005 “Për parandalimin dhe konfliktin e interesave të punonjësve që ushtrojnë profesione publike”.

4. Ligji nr. 9049, datë 10. 04. 2003 “Për deklarimin dhe kontrollin e pasurive, i ndryshuar”.

5. Ligji “Për ndryshimet në ligjin “Antimafia””.

Pandeli Majko - Keni ndonjë merak tjetër?

Shefqet Dida – Jo, por, nëse ka pyetje, jam në gjendje të përgjigjem, zoti kryetar!

Pandeli Majko - Ka pyetje?

Sa fëmijë ke?

Shefqet Dida – Katër fëmijë.

Pandeli Majko – I paç me jetë!

Faleminderit që erdhët dhe mbarësi!

Shefqet Dida – Faleminderit juve dhe gjithë të mirat!

Pandeli Majko – Vazhdojmë me kandidaten Suela Zhegu.

Suela Zhegu – Përshëndetje të gjithëve!

Pandeli Majko – Përshëndetje, zonja Suela!

Keni tre minuta kohë për t’u shpjeguar kolegëve të komisionit arsyen pse dëshironi të kandidoni për të gjitha pozicionet që janë shpallur nga Kuvendi i Shqipërisë. Arsyeja që koha për të folur është tre minuta, është se ju jeni intervistuar edhe nga komisionet e mëparshme për aftësitë tuaja profesionale. Kjo nuk ka asnjë efekt negativ, sepse secili prej nesh në komision e ka përpara CV-në tuaj.

Fjala është për ju.

Suela Zhegu – Shprehja e interesit për institucionet e rivlerësimit ka ardhur më shumë si thirrje e brendshme, pasi vetëtimin e kam konsideruar proces me rëndësi historike për integrimin dhe të ardhmen e vendit dhe kandidimin tim si një kontribut për t’i shërbyer reformës në drejtësi.

Pavarësisht kritereve formale, që unë i plotësoj, për të qenë faktor kontribues, duhet të jesh i aftë profesionalisht, sidomos për institucionet e rivlerësimit, pasi jo vetëm që është çështje përgjegjësie, por duhet të njohësh sistemin gjyqësor dhe të jesh kontribues.

Mendoj se përvoja ime 20-vjeçare në sistemin gjyqësor është e mjaftueshme që unë të jem një faktor kontribues në këto institucione.

Institucionet e vetëtimin kanë nevojë për individë të pavarur, në pajtim me ushtrimin e detyrës nga subjekti i rivlerësimit dhe të lirë në vendimmarrje, me qëllim garantimin e funksionimit të shtetit, të së drejtës, zbatimin e reformës në drejtësi, si dhe rikthimin e besimit...

Pandeli Majko – Zonja Suela, mos u ndjeni në siklet, sepse nuk po ju merr njeri në provim që t’ju shpallë ngelëse ose kaluese. Deri këtu ju kanë sjellë aftësitë tuaja profesionale, prandaj mos u shqetësoni dhe vazhdoni pa...

Ndonjë merak që ne duhet ta dimë, keni?

Suela Zhegu – Nëse po kërkon kandidatat me këto cilësi, për të shërbyer në këto institucione me korrektësi, për të ushtruar detyrën në mënyrë efikase dhe të pavarur nga çdo ndikim i paligjshëm, të lirë në vendimmarrje për të pastruar sistemin e drejtësisë nga të korruptuarit dhe të inkriminuarit, unë angazhohem të jem një nga këta kandidatë.

Pandeli Majko – Ka ndonjë pyetje nga kolegët?

Ju uroj mbarësi!

Suela Zhegu – Faleminderit!

Vazhdojmë me kandidaten Suzana Hoxha.

Urdhëroni!

Suzana Hoxha – Përshëndetje!

Pandeli Majko – Zonja Suzana, keni tre minuta kohë në dispozicion për t’u shpjeguar anëtarëve të komisionit arsyet pse dëshironi të kandidoni për komisionere publike.

Arsyeja pse koha për të folur është tre minuta, është se secili nga kolegët e ka CV-në tuaj përpara dhe se ju jeni intervistuar edhe nga një komision tjetër, i cili ka bërë vlerësimin e aftësive tuaja, prandaj mos e merrni si metaforë negative këtë kohë.

Fjala është për ju.

Suzana Hoxha – Faleminderit, i nderuar!

Si pasojë e përvojës sime si drejtuese prej disa vitesh në Avokaturën e Shtetit në Durrës dhe Tiranë, kam arritur të fitoj një eksperiencë, e cila më mundëson të bëjë një vlerësim të paanshëm dhe objektiv të integritetit moral, profesional dhe etik të një punonjësi të sistemit të drejtësisë.

Karakterizohem nga vendosmëria pozitive dhe vetëbesimi. Përfaqësoj një profil të lartë moral dhe profesional, të cilin do të përpiqem ta shpreh edhe në qëndrimet apo vendimet e mia. Kjo është edhe arsyeja pse unë kam aplikuar për këtë pozicion pune.

Pandeli Majko – Masterin e keni mbaruar në Universitetin e Prishtinës?

Suzana Hoxha – Po, i nderuar.

Pandeli Majko – Në rregull.

Keni ndonjë gjë tjetër?

Ka pyetje nga kolegët?

Ju falenderoj dhe suksese!

Vazhdojmë me kandidaten Suzana Pasha.

(Diskutime pa mikrofon.)

(Zoti Majko flet pa mikrofon)

Suzana, keni tre minuta kohë për t'u shpjeguar kolegëve të komisionit arsyet pse kandidon për të gjitha pozicionet e shpallura nga Kuvendi i Shqipërisë. Arsyeja pse koha për të folur është tre minuta, është se ju jeni intervistuar edhe në komisionet e mëparshme dhe secili nga kolegët e ka përpara CV-në tuaj. Çfarë mendon se duhet të dinë anëtarët e komisionit për kandidimin tuaj?

Fjala është për ju.

Suzana Pasha (Hoti) – Unë jam Suzana Pasha, me banim në Burrel dhe profesion juriste.

Në vitin 1994 jam emëruar ndihmësgjyqtare, detyrë të cilën e kam kryer për 6 vjet në Gjykatën e Rrethit Gjyqësor Mat dhe nga viti 2000 e deri sot jam avokate për të gjitha nivelet e gjyqësorit, për shkak edhe të vjetërsisë.

Mendova të kandidoj, kryetar, jo vetëm se plotësoj kriteret ligjore të përcaktuara në ligj, por sepse unë kam punuar në këtë profesion për 23 vjet.

Duke punuar për kaq kohë në këtë profesion, mendoj se jam rritur profesionalisht, kam të gjitha mundësitë e duhura dhe njoh konsiderueshëm problematikat e sistemit gjyqësor.

Mendoj dhe besoj fort se aftësitë e duhura profesionale, përkushtimi për punë dhe korrektesa nuk më mungojnë.

Duke qenë avokate, durimi është kalitur dhe mendoj që për një nga pozicionet, meqenëse kandidoj dhe i plotësoj kriteret për të gjitha pozicionet, them se jam një kandidate potenciale.

Përveç kësaj, nëse do të më jepet mundësia që të zgjidhem nga këto komisione, unë do të jem e drejtë në vendimmarrje si për subjektin e rivlerësimit, por edhe duke respektuar parimet e së drejtës.

Faleminderit!

Pandeli Majko – Suzana,

Deri këtu keni ardhur sepse e keni merituar. Për çfarë do të ndodhë më pas, do të jetë faji i politikës, yni, prandaj mos u shqetëso për asnjë gjë!

Suzana Pasha (Hoti) - Faleminderit!

Nuk fajësoj njeri, sepse bëra çfarë kisha në dorë.

Pandeli Majko – Si rrallë herë më parë, ke pasur simpatinë e dy kolegëve të partive të ndryshme. Sapo erdhët, ne filluam t'ju ngacmojmë, por gjithmonë në sensin pozitiv.

Suzana Pasha (Hoti) – Ndoshta s’do të lodhemi vetëm ne duke punuar si avokatë privatë. Ndoshta shteti do të ketë besim edhe te ne, që kemi punuar si avokatë privatë.

Pandeli Majko – Të uroj gjithë të mirat dhe mbarësi!

Suzana Pasha (Hoti) - Faleminderit!

Gjithë të mirat dhe punë të mbarë!

Pandeli Majko – Valbona Sanxhaktari.

Valbona Sanxhaktari – Përshëndetje!

Pandeli Majko – Zonja Valbona,

Keni 3 minuta kohë për t’i shpjeguar komisionit arsyen pse dëshironi të kandidoni në pozicionet e shpallura nga Kuvendi i Shqipërisë...

(Flet pa mikrofon.)

Valbona Sanxhaktari – Unë kam aplikuar për dy pozicione: për komisionin dhe për kolegjin. Nuk e kam parë shënimin.

Pandeli Majko – Zonja Valbona,

Nuk ka problem fare. E rëndësishme është që të na thoni detajet që ju i konsideroni më të rëndësishme.

Valbona Sanxhaktari – Unë kam një CV që ju e keni parë. Sipas CV-së time, unë mendoj që i plotësoj të gjitha kriteret që kërkohen për këtë aplikim. Madje kur bëra aplikimin, u kënaqa sepse mendova që më në fund më erdhi një mundësi shumë e mirë për njerëz si unë, të cilët i kishin këto aftësi profesionale dhe nuk ishin implikuar në procedura të ndryshme partiake e të tjera dhe mendova se kjo ishte një mundësi shumë e mirë për mua dhe për të gjithë eksperiencën time të punës për të bërë një hap më përpara dhe për të shkuar në një vend, siç është ky.

Unë mendoj që i përkas pjesës së brezit të ri, të atij brezi, i cili ka dëshirë që Shqipëria të bëhet një ditë. Mendoj se i plotësoj të gjitha kriteret formale dhe kriteret shtesë që janë kërkuar. Mendoj se kandidatura ime është një kandidaturë e mirë për pozicionet e shpallura.

Pandeli Majko – Kush nga kolegët ka pyetje? Nuk ka.

Zonja Valbona,

Faleminderit!

Gjithë të mirat dhe mbarësi!

Valbona Sanxhaktari – Faleminderit!

Mirupafshim!

Pandeli Majko – Valbona Legisi.

Urdhëroni, zonja Valbona!

Zonja Valbona,

Keni 3 minuta kohë për t'i shpjeguar komisionit arsyen pse dëshironi të kandidoni për komisionere publike. Sigurisht, ju jeni dëgjuar edhe nga komisioni i mëparshëm, i cili ka vlerësuar aftësitë tuaja profesionale. Secili nga kolegët e ka përpara CV-në tuaj. Kjo është dhe arsyeja që koha e caktuar është e shkurtër. Flisni për detajet që ju mendojnë se duhet t'i dijë komisioni. Gjithçka që do të thoni, është e regjistruar dhe zyrtare.

Valbona Legisi – Faleminderit!

Arsyeja pse unë kam kandiduar për këtë pozicion pune është fare e thjeshtë, i nderuar. Besoj se jam e përshtatshme, meqë këtu ku jam, eksperiencën e kam arritur falë punës sime, duke punuar fort dhe me një përgjegjshmëri të lartë. Besoj në reformën që është ndërmarrë dhe mendoj se do të finalizohet, duke u nisur edhe nga fakti që i gjithë ky proces është transparent. Fakti që unë jam kualifikuar deri këtu, më ka bërë të bindem edhe më shumë për këtë, i nderuar. Kjo është arsyeja pse unë kam kandiduar për këtë pozicion.

Pandeli Majko – Dakord.

Kush nga kolegët ka pyetje? Nuk ka.

Faleminderit!

Valbona Legisi – Faleminderit!

Punë të mbarë!

Pandeli Majko – Gjithë të mirat dhe mbarësi!

Vojo Malo. Keni 3 minuta kohë për t'i shpjeguar komisionit arsyen pse dëshironi të kandidoni për të gjitha pozicionet. Sigurisht, ju jeni dëgjuar edhe nga komisioni i mëparshëm, i cili ka vlerësuar aftësitë tuaja profesionale. Secili nga kolegët e ka CV-në tuaj. Kjo është dhe arsyeja që koha e caktuar është lënë kaq e shkurtër.

Vojo Malo - Faleminderit!

Atëherë, unë kam lindur në Tiranë dhe po këtu i kam kryer të gjitha studimet. Kam kryer studimet në Fakultetin e Drejtësisë të Universitetit të Tiranës. Jam emëruar më pas në Hetuesinë e Tiranës, ndërkohë që merresha edhe me volejboll me ekipin kombëtar dhe me ekipin “Dinamo” për një periudhë 5-vjeçare.

Më pas kam kaluar kryetar i Arbitrazhit në Ministrinë e Industrisë Ushqimore të asaj kohe.

Në vitin 1987 kam kaluar...

Pandeli Majko – Mos u shqetëso se secili nga kolegët e ka CV-në tuaj!

Vojo Malo – Janë të gjitha në CV. Më pas kam kaluar në një ndërmarrje të tregtisë së jashtme dhe më pas, kam kryer një kurs pasuniversitar në Londër në *Queen Mary Westfield College* dhe kam që nga viti 1996 e deri sot që po punoj si avokat.

Vazhdoj të angazhohem në aktivitete të ndryshme. Aktualisht, jam kryetar i Komisionit të Etikës në Komitetin Olimpik Shqiptar dhe president i Federatës Shqiptare të Harkut. Kam shumë hobi.

Pandeli Majko – Nuk është e nevojshme të na shpjegoni hobet, se nuk kanë të bëjnë fare me arsyen e mbledhjes së këtij komisioni.

Vojo Malo – E them këtë, sepse kur shkova në Londër, aplikova në një kohë kur kishte një moshë maksimale tavan që unë e kisha kaluar dhe megjithatë, fitova vetëm unë nga 36 aplikantët shqiptarë. Kur i pyeta pse më kishin zgjedhur mua nga 36 aplikantët shqiptarë, të cilët ishin brenda moshës së duhur, më thanë se isha i vetmi që përveç aspektit profesional, kisha vënë në CV edhe hobet. Kandidatët e tjerë nga Shqipëria nuk kishin vënë asnjë hobi të tyre në CV. E thashë këtë, sepse është çështje vlerësimi.

Pandeli Majko – E kuptova.

Mendoj se kjo është edhe çështje sinjoriteti në diskutim.

Kush nga kolegët ka pyetje?

Dhurata Çupi (Tyli) – Faleminderit, që keni ardhur!

Kisha një pyetje: nëse ju fitoni, vini ndaj sistemit të drejtësisë me një mllef, me pakënaqësi apo vini me një mendim realist?

Vojo Malo – Unë kam aplikuar në ditën e fundit të afatit. Arsyeja që aplikova nuk është se kisha fillimisht ndonjë interes vetë. Thjesht, pasqer paraqitjen që bëri ambasadori amerikan në *facebook*. Pse më tërhoqi nuk e di, por aplikova.

Pse duhet të jem unë në këtë apo në atë pozicion? Sigurisht, nuk kam asnjë mllef apo ndonjë gjë tjetër, por ngaqë gjatë karrierës sime, në të gjitha drejtimet kam qenë gjithmonë i ndershëm, i sinjertë dhe i pastër, mendoj që ky vend ka nevojë për mua. Unë nuk nevojë për të. Unë jam avokat dhe i kam të gjitha arritjet në jetën time.

Pandeli Majko – Faleminderit, zoti Vojo!

Ju uroj mbarësi!

Vojo Malo – Faleminderit, juve!

Mirupafshim!

Pandeli Majko – Zonja Xhensila Pine. Më duket se kjo është kandidatja e fundit.

Zonja Xhensila, urdhëroni!

Keni 3 minuta kohë për t'i shpjeguar komisionit arsyen pse dëshironi të kandidoni në të gjitha pozicionet e shpallura nga Kuvendi i Shqipërisë. Sigurisht, ju jeni dëgjuar edhe nga komisioni i mëparshëm, i cili ka vlerësuar CV-në dhe aftësitë tuaja profesionale. Secili nga kolegët e ka CV-në tuaj. Kjo është dhe arsyeja që koha e caktuar është kaq e shkurtër.

Xhensila Pine – Unë kam aplikuar për të tria pozicionet. Përvoja ime profesionale dhe siç e kam thënë edhe në intervistat e mëparshme, integriteti im moral dhe profesional, më shtynë të aplikoj dhe të jem një nga kandidatët, të cilët mund të zgjidhen në organet e sistemit të drejtësisë. Është shënuar te CV-ja ime, por e ritheksoj edhe një herë që përvoja ime profesionale në institucionet e rëndësishme së veçantë, siç është parandalimi i pastrimit të parave, ku kam punuar si shefe e inspektimit, më ka dhënë një përvojë të shtuar në lidhje me procesin, i cili po aplikohet nga Kuvendi i Shqipërisë.

Në lidhje me integritetin moral, e kam thënë dhe e ritheksoj që në ditët e sotme është një vlerë dhe në ditët e sotme unë arrij të them që të gjitha pozicionet e punës i kam fituar nëpërmjet konkurrenive të rregullta dhe nuk kam asnjë masë disiplinore apo çështje të ndryshme të diskutueshme gjatë karrierës sime profesionale dhe nga të gjitha pozicionet e mëparshme jam larguar me dëshirën time.

Besoj se edhe përvoja ime si pedagoge e së Drejtës Kushtetuese për 10 vjet në Fakultetin e Drejtësisë të Universitetit të Tiranës, dhe në disa universitete private dhe përvoja ime si trajnere e të drejtave të njeriut, çështje që besoj se janë të rëndësishme në këtë proces, pasi besoj që respektimi i Kushtetutës dhe i të drejtave të njeriut duhet të jenë baza e punës së të gjithë individëve të zgjedhur nga Kuvendi, do të ishin pikat e mija më të forta për të cilat pretendoj dhe këto janë edhe arsyeja pse kam aplikuar për këto vende.

Faleminderit!

Pandeli Majko – Kush nga kolegët ka pyetje? S'ka.

Zonja Xhensila,

Ju uroj mbarësi dhe suksese!

Xhensila Pine – Faleminderit!

Pandeli Majko – Atëherë, stafi do të bëjë zbardhjen e të gjitha intervistave. Do t'ju lutesha t'ua kaloni të gjithë kolegëve, edhe atyre që nuk kanë qenë sot, të gjitha intervistat.

Nuk e di nëse do të ishte e nevojshme t'u bashkëngjiteshin edhe CV-të. Kam përshtypjen se u janë çuar paraprakisht.

Atëherë, t'u çohen kolegëve të gjitha intervistat e sotme të zbardhura! Mbase do të ishte e nevojshme që të informohen edhe kryetarët e komisioneve të tjera, në mënyrë që të ketë një balancim dhe një shkëmbim të informacionit, ashtu siç na e kanë dhënë edhe ata neve.

E kam shumë problem faktin që një pjesë e kolegëve për arsye të justifikuara, sepse jemi në fushatë elektorale, kanë munguar sot me arsye. Ata duhet të jenë në dijeni të plotë me atë çfarë u bë sot në komision. Njoftimin për takimin tjetër do ta bëjmë nëpërmjet zyrës së Kuvendit.

Më lejoni t'i falënderoj nga zemra të gjithë kolegët e mi të PD-së, të PS-së, të LSI-së dhe të PDIU-së, që morën sot pjesë në këtë intervistim mjaft të veçantë dhe mjaft interesant njëkohësisht!

Faleminderit!

MBYLLET MBLEDHJA

